


柳田文庫
文庫11
D 289
19

19



文庫 11
D 289
19

元書卷九十五

藝術列傳第七十

邵陽曾廉撰

昔帝舜命垂其工以讓爰斯曰爰斯蓋以其所長而名也易曰易有聖人之道四焉以言者尙其辭以動者尙其變以制器者尙其象以卜筮者尙其占君子將有爲也將有行也問焉而以言其受命也如嚮無有遠近高深遂知來物嗟乎易書所稱其後世藝術家所託始乎吾嘗攷制器尙象始見於繫辭言網罟取諸離舟楫取諸渙弧矢取諸睽書契取諸夬衣裳取乾坤宮室取大壯杵臼取小過棺槨取大過之類然後未有倣之者也占之事則以卜筮或遺卜筮而不用而嘒嘒自詡其知來之異揆厥所元往往稱先聖有之傳記所載秦始皇發書知亡於沙邱鍾離意發書知伯張

元書

卷九十五 藝術傳

一

010190564059

藏璧是也何其怪耶禮中庸曰至誠之道可以前知禎祥妖孽見乎著龜動乎四體故至誠如神其聖人之謂乎故曰非天下之至精其孰能與於此然聖人知國之興亡人之始終事之成敗而已此皆因人事而決以天道非索之窈窈冥冥極之千數百年而以爲神也自漢儒不達其意於是書言五事休咎春秋言五行災異詩言四始五際易尤多門未可窮詰京房郎顛眭孟李尋翼奉之徒相率附會以求其驗其後管輅郭璞加以誕謾璞經生文人乃類於方士至釋道大興益又荒大不經竇誌陸法和寇謙之佛圖澄始譁神天終類巫覡甚矣其褻也至宋以來邵雍以知來聞又異於漢人矣其易道固寬大周徧耶抑別有授受尋究而然也而制器亦代有新異古人筵席而後人代以卓倚古人弓刀而後人增以礮石以及宮室之式衣裳之制房箱異形匹幅異度大抵皆

後人日趨於華而樂其便也於是玉杯象箸桀紂古帝王之豪猶以爲侈而後之富人精巧百倍於昔至於攻城爭地磨礮羣飛而死亡之慘烈甚於鋒刃矣是故奇技淫巧非考工所得而窮元遠新奇非齊諧所得而志也元興耶律楚材劉秉忠最名神慧天人之際較其得失不差絜黍而邱處機號爲神仙八思巴號爲帝師張宗演號爲天師其黨皆善禳禱卻疾病除患難解兵戎皆時人之所嘖嘖稱道也吾以爲楚材秉忠非術人也陰陽之數星秣之精三式之巧田忠良靳德進當擅之以其知禱祀也然其言亦殊忠正非竊食廩祿者醫人之良若李朱滑葛之流亦不易及矣帝師之號乃以崇髡徒天亦有師尤可笑也胡應麟論釋道原流支派謂八思巴位號前古未有又邱長春師王嘉道門別傳也夫老子爲道家而流爲神仙之術如來爲佛陀乃以布施供養遂爲功

德原其始初豈非大相刺謬况炫之以神異以圖罔惑乎彼固未嘗自託於易而亦惡可以知來概予之哉然後知聖經宏深初不禁人之依託而無不廢然而返也又况乎凶橫淫穢叛逆之徒乎此方士所以爲人薄者也余乃錄田忠良以下二十餘人爲藝術傳蓋藝術易世而有變遷未可以今反古而賢否異途故皆著於篇以示勸戒且以知韓愈拓清佛老之功不在禹下也

田忠良字正卿其先平陽趙城人也金亡徙中山忠良好學通儒家雜家言以善陰陽聞嘗識太保劉秉忠於微時秉忠薦於世祖遣使召至世祖見其狀貌步趨甚器重之卽指西序第二人謂忠良曰彼手中何物對曰雞卵也果然遂送詣司天臺給之筆札令秉忠試星秣遁甲諸書皆通詔官之司天帝曰朕用兵江南困於襄樊累年不決奈何對曰在酉年矣至元十一年行省阿里海牙

請益兵十萬渡江朝議難之帝密問忠良濟否曰濟帝方獵於柳林御幄殿侍臣甚眾顧忠良曰今拜一大將取江南朕心已定果何人耶忠良環視左右目一人對曰是偉丈夫可屬大事所目者乃伯顏也帝喜其與己意協賜鈔五百貫衣一襲其秋夜白氣貫三台帝問何祥對曰三公其死乎未幾劉秉忠卒帝又問以南征事對曰明年正月當奏捷矣至期果取鄂州伯顏遣使來獻宋寶有玉香爐卽以賜焉附以金織文十匹尋帝違豫召謂曰或云朕今歲不嘉汝云何對曰聖體行自安矣閱月而愈賜銀五百兩及衣材駕清暑上都遣使來召曰叛者寢入山陵久而不去汝與和禮霍孫往視之既至山陵如故俄而叛兵大至圍三日不解忠良引眾夜歸敵茫不覺也和禮霍孫以爲神以聞於帝賜黃金十兩海都爲邊患將遣北平王那木罕丞相安童征之忠良奏曰不吉

將有叛者帝不悅已而王及安童竟爲河平王昔里吉劫去帝乃信忠良卽命祀神致禱曰無事於神未年當還也亦竟如其言車駕駐隆興北忠良奏曰昔里吉之叛以安童之食不及彼也今宿衛之士日食一瓜豈能充飢竊有怨言矣帝怒答主膳二人俾均其食十五年汴梁河清三百里帝曰憲宗生河清朕生河又清今河復清何耶對曰應在皇太子宮矣帝曰是不妄言殆有徵也命爲太常丞少府爲永甯王昌童建宅太廟南忠良往仆其柱少府奏之帝以問忠良對曰太廟前豈諸王建宅所耶帝曰卿言是也忠良因卽奏曰太廟前無馳道非禮也帝卽敕中書闢道國制十月上吉有事於太廟或請牲不用牛忠良曰梁武帝用麩爲犧牲後何如耶從之遷太常少卿帝命將征日本命擇日出師忠良曰僻陋海隅何足勞天戈不聽師遂無功後請建太社於朝右建郊

壇於國南遷太常卿成宗立加昭文館大學士及帝崩阿忽台等持異謀將以皇后教祔成宗於廟忠良爭曰嗣皇帝祔先帝於廟禮也皇后教非制也阿忽台等怒曰制自天降耶汝不畏死敢沮大事忠良竟不從武宗卽位拜大司徒賜銀印與議南郊北郊之禮語在郊祀志皇慶初命詣玉華宮祀睿宗御容延祐四年卒年七十五贈推忠守正佐運功臣太師開府儀同三司上柱國趙國公諡忠獻子天澤官翰林侍講學士知制誥兼修國史

靳德進其先潞州人也後徙大名父祥師事陵川郝溫兼善星秣金末兵亂與母相失母悲泣而盲祥訪得之舐其目百日復明人稱其孝國初劉敏行省燕京辟祥置幕下佩以金符時藩帥得任生殺無辜者多賴祥以免贈集賢大學士諡安靖德進爲人材辯幼讀書能通大義父歿益自刻厲尤精星秣之學世祖命太保劉

秉忠選太史官屬德進以選受天文星祿卜筮三科管勾凡交食
躔次六氣侵沴所言休咎輒應時因天象以進規諫多所裨益累
遷祕書監掌司天事從征叛王乃顏揆度日時率中機會諸將欲
剿絕其黨德進獨陳天道好生請緩師以待其降俄奏言叛始由
惑於妖言遂謀不軌宜括天下術士設陰陽教官使訓學者仍歲
貢有成者一人帝從之遂著爲令成宗以皇孫撫軍北邊帝遣使
授皇太子寶德進預在行凡攻戰取勝皆豫尅期日無不驗者亦
閒因事得失規諷爲多成宗卽位德進歷陳世祖進賢納諫咨詢
治亂之原帝嘉納之授昭文館大學士知太史院領司天臺事賜
金帶宴服都城以荻苫廩或請以瓦易之帝以問德進對曰若是
役驟興物必踊貴民力重困臣愚未見其可議遂寢敕中書自今
凡集議政事必使德進預焉所建明多見於施行尋以病乞閒仁

宗時在東宮特令中書留之會車駕自上京還召見白海行宮授
中書右丞議通政院事仁宗卽位命領太史院事力辭不允以疾
終於位贈大司徒魏國公諡文穆子泰官工部侍郎

張康字汝安潭州湘潭人也早孤力學旁通術數宋呂文德江萬
里及留夢炎並推重之辟致幕下宋亡隱衡山至元十四年世祖
遣中丞崔彧祀南嶽就訪隱逸彧兄斌言康隱衡山學通天文地
理彧還具以聞遣使召至上都帝親驗之乃授著作佐郎以內嬪
松夫人妻之凡召對禮遇殊厚呼以明遠而不名明遠者康別號
也嘗有所問使極言之十八年康上奏歲壬午太一理良宮主大
將客參將囚直符治事正屬燕分明年春京城當有盜兵事干將
相十九年王著等果矯皇太子旨殺阿合馬帝欲征日本命康以
太一推之康曰南國甫定民力未蘇且今年太一無算不利舉兵

事亦且止帝嘗賜太史院錢分千貫以與康不受眾服其廉久之乞歸田里優詔不許遷秘書監丞卒其時陸文圭字子方江陰人宋鄉貢進士明天文地理律秣醫藥算數之學宋亡隱居城東學者稱牆東先生延祐初一再中鄉舉及卒先一日語門人曰以術考之吾州二十年後必有兵災慘於五代建炎吾死當葬不食之地勿封勿樹使人不知有墓庶無暴骨之患其後江陰之亂冢墓盡發人乃服其先知文圭爲人負奇氣又有文名又奎章閣大學士阿榮亦明數學言輒有驗已附其諸父禿忽魯傳

傅立字權甫號初菴饒州德興人也以占筮起東南時杭州初內附世祖以宋故都疑或有再興者命占之對曰其地六七十後會見城市生荆棘也其後杭州數厄於火至正壬辰以後又數燬於兵昔年歌舞之場鬱爲草莽畜豕載道竟如其占官終集賢大

學士謚文懿立乃番陽祝泌甥泌精皇極數者也立又學於建昌廖應淮淮自言得邵氏書於灰燼其術以聲色臭味起數而推極乎元會運世卽其數之所見天地氣運之否泰人生吉凶休咎之微無不可以預定立弟子齊琦字仲圭亦番陽人嘗至衢有周孚者邀詣其家問焉琦曰君造居室已歷一紀則歲中當生三子男孚補縣幕當以明年三月上琦曰子赴官在今年九月也與同適市指一女子曰此爲子家明年八月生子者也孚因納爲子妾未幾其前官有故九月卽之官其年而妻產子明年而子婦復育至八月所納妾亦生子矣時有二客叩門琦聞聲曰二人皆三品官而不終也二人者一潭守伯篤魯丁一衢守將趙甲也後竟以罪廢江浙平章忽都不花致琦問動靜琦曰今當入理財賦爲卿矣報至果以其日除太府卿琦曰當改入中書徐復平章也果至中

塗改參知政事逾年爲左丞數年累官平章政事有進士三人曰
哲理野台曰易南海身曰普顏同謁琦琦謂哲曰子必作郡推官
而散官五品又曰子當作郡守階三品又曰皆非也子當作行省
理問官階四品耳易曰我當及五品琦曰不能也府判縣尹縣尹
府判府判縣尹終六品耳普曰吾當六品琦曰子可至五品爲漕
運官已而哲調潮州推官及除高州總管中書皆不許果除行省
理問官而散官四品易迭調縣尹府判皆不任後復除浦城縣尹
以終普除海道鹽運千戶亦果五品也江浙提學黃潛年六十有
六將致仕琦曰此在明年當帶秘閣職名七年復起位一品然公
性褊少容止可二品果明年以秘書少監致仕至七十有三復召
爲翰林直學士升侍讀學士而歸樞密參議歸賜謁琦琦曰公旦
夕當升本府尋任風紀又登政府也頃之遷樞密判官卽擢河西

廉訪使遂拜四川參知政事平章教化致琦曰公卽出中書矣九
日而除大司農琦又曰當復遠出俄命平章江浙政事琦嘗謂所
知曰自今以往天下多故不十五年京邑南遷矣又嘗語人曰南
士行入風憲矣時省臺擯南士不用已久未幾果有詔用南人其
精驗如此琦嘗用薦者署長初菴書院至正己丑歸至京師遂屏
居番陽山中庚子乃攜妻子至金陵居焉琦恥以術數名家言論
必要歸於道德士大夫用是尊慕之琦不仕明而卒立同時有李
國用者登州人能望氣相人每恃術傲兀凡延致必上坐無所詰
嘗至杭謂過江惟趙孟頫一人當官一品名聞四海後入都世祖
命至襄陽軍中望氣至未久遄還奏曰臣見卒伍中往往有公輔
相若江南不平安所得之國用自言早時爲卒遇仙人授以觀日
之法能洞見肺腑云

趙友欽字敬夫饒州德興人也其先於宋有屬籍或曰名敬字子恭又曰子公時人稱爲緣督先生習天官遁甲鈐式諸書一日坐芝山酒肆中逢修眉方瞳者索酒飲異而卽之相談頗洽久之出囊中丹經遺之臨別問姓名曰吾扶風石得之也自是往來海上獨居十年注周易數萬言復棄去乘青騾往來衢婺山水間其旅費未嘗乏絕倦游而休泊然而化葬於龍游雞鳴山友欽尤善天算嘗撰革象新書作乾象周髀法有割圓平方徑十寸其積百寸內作同徑之平圓圓內又作平方復自四隅遞增曲圓至十二次以六小句股弦幕相求所得小絃以萬六千三百八十四乘之得三十一寸四分一釐五毫七絲二忽爲徑十寸之圓周與宋祖冲之徑一百一十三周三百五十五合冲之以割六弧起數友欽以四角起數其致一也又張居中字正之官司天判官嘗作六壬祛

惑鈐耶律楚材爲之序以爲一家之言而元代算學推李冶朱世傑皆由心得李冶事已具隱逸傳世傑字漢卿號松庭寓居燕山當世以爲與宋秦九韶元李冶堪爲鼎足著述皆在藝文志是時瑞安陳時敏復心嘗玩天文圖及璇璣玉衡說家設一石盆刻周天度於上自構巧法占之仍於高山平衍處鑿竹爲圭冬夏測景乃自製秣書閩浙間盡用之號爲溫秣後至正十二年司天臺言正月朔當日食時敏言其不驗已而果然朝遣學士范天碧徵之不起薦其友張洙應命洙亦明秣法有聲於時

李杲字明之真定鎮州人也少通春秋書易博聞強記然好醫藥時易州張元素以醫名燕趙間杲捐千金從之學不數年盡傳其業元素事在金史方技傳杲世以資雄鄉里操有餘以自重人不敢以醫名之士大夫或病其資性高蹇少所降屈非危急之疾不

敢謁也北京人王善甫爲京北酒官病小便不利目瞪突出腹脹如鼓膝以上堅硬欲裂飲食且不下甘淡滲泄之藥皆無效杲謂眾醫曰疾深矣內經有之膀胱者津液之府必氣化乃出焉今用滲泄之藥而疾益甚者是氣不化啓元子云無陽者陰無以生無陰者陽無以化明日投以黃檗知母而佐以桂不再服而愈西臺掾蕭君瑞二月中病傷寒發熱醫投以白虎湯面黑如墨本證不復見脈沈細小便不禁杲診之曰此立夏前用白虎湯之誤也白虎湯大寒非行經之藥或更以大熱之藥救之以苦陰邪則他證必起矣吾籌之其惟升陽行經乎或疑而難之杲曰病隱於經絡間陽不升則經不行經行而本證見矣本證又何難焉果如其言而愈魏邦彥之妻目翳暴生從下而上其色綠腫痛不可忍杲云翳從下而上病從陽明來也綠非五色之正殆肺腎合病也乃瀉

肺腎之邪而以陽明之藥爲之使既效矣而他日病復作者三杲乃曰諸脈皆屬於目脈病則目從之此必經不調故目病未已也問之果然因如所論而治之病遂已馮櫟年十五六病傷寒目赤而煩渴脈七八至醫欲以承氣湯下之杲適至爲切脈大駭曰幾殺此兒內經有言在脈諸數爲熱今八九至是熱極也而會要大論云病有脈從而病反者何也脈之而從按之不鼓諸陽皆然此傳而爲陰證矣令持薑附來藥未就而病者爪甲變頓服者八兩汗尋出而愈陝帥郭巨濟病偏枯二指著足底不能伸杲以長針刺骹中深至骨而不知痛出血二三升色如墨又且謬刺之服藥三月病始可裴擇之妻病寒熱月事不至者數年已喘嗽矣醫者率以蛤蚧桂附投之杲曰不然夫病陰爲陽所搏又溫劑太過故無益而反害投以寒血之藥則經行矣已而果然杲之設施多類

此憲宗元年卒當時皆以神醫目之稱爲東垣先生義烏朱震亨與杲齊名號丹溪先生元代名醫稱李朱著述皆在藝文志震亨儒者爲許謙高弟常引太極之理易禮記通書正蒙之義貫穿內經之旨要以主靜無欲行事已附儒林許謙傳然杲嘗著論發明內傷有似外感辨別陰陽寒熱有餘不足而大旨總以脾胃爲主震亨則謂陽易動陰易虧獨重滋陰降火二家旨似異其實互相成也初李杲作脾胃論其後有作脾胃後論以補其不備者曰項昕

項昕字彥章温州永嘉人也而居於越早敏慧好方數未成童已暗誦素難諸書稍長就傅學易後以母病醫誤投藥死於是遂大痛聞越大儒韓性爲方善也遂往拜之盡得所藏方論甚富會金華朱震亨來越出金源劉完素張從正李杲諸書示之昕復出往

浙西見葛乾孫與論劉張學又受橋引按摩法於太醫院使張廷玉皆盡其技於是所治無不立驗里鍾姓一男子痛脇痛眾醫以爲癰也投諸香薑桂之屬益甚昕脈之曰此腎邪病法當先溫利而後竭之投神保丸下黑溲痛止卽令更服神芎丸或疑其太過昕曰向用神保丸以腎邪透膜非全竭不能引導然巴豆性熱非得芒硝大黃蕩滌之後遇熱必再作乃大泄數出病已昕所以知男子病者陽脈弦陰脈微澀弦者痛也澀者腎邪有餘也腎邪上薄於脇不能下且腎方惡燥今以燥熱發之非得利不愈經曰痛隨利減殆謂此也鍾女病腹脹如鼓四體骨立眾醫或以爲娠也蠱也瘵也昕脈之曰此氣薄血室鍾曰服芎歸積歲月矣昕曰失於順氣也夫氣道也血水也經曰氣血同出而異名故治血必先順氣俾經隧得通而後血可行以蘇合丸投之三日而腰作痛昕

曰血欲行矣急治硝黃峻逐之下汗血纍纍如瓜十數枚遂愈所以知女病者以六脈弦滑而數弦者氣結滑者血聚實邪也故氣行而大下之鍾有從女病名同而診異昕曰此不治法當數月死向者鍾女脈滑爲實邪今脈虛元氣奪矣又一女子病亦同而六脈俱弦昕曰真藏脈見法當踰月死後皆如之越幕官費姓有子病甚眾醫皆以爲瘵盡愕束手費對客而泣因薦昕脈之曰此病暑邪非瘵也家問死期昕曰死耶飲以白虎湯立愈昕所以知者脈細數而且實細數者暑也暑傷氣宜虛今不虛而反實乃熱傷血藥爲之也費病胸膈滿甚篤昏不知人醫者人人異見昕以杏仁薏苡之劑灌之遂蘇繼以升麻黃耆桔梗消其脹服之踰月瘳昕所以知費病者以陽脈浮滑陰脈不足也浮爲風而滑爲血聚始由風傷肺故結聚客於肺陰脈之不足則過於宣逐也諸氣

本乎肺肺氣治則出入易故行其肺氣而病自己浙帥胡病發熱惡風自汗氣奄奄弗屬醫爲發表退熱益增昕脈之陰陽俱沈細且微數處以補中益氣之劑醫曰表邪而補之必死是藥矣昕曰脈沈者裏病也微數者五性之火內扇也氣不屬者中氣虛也是名內傷經曰損者溫之飲以前藥卽愈南臺郭公久患泄瀉惡寒見風輒仆日臥密室以氈蒙首熾炭對語咿咿如嬰兒諸醫以爲沈寒也大溫之不驗昕曰此脾伏火邪溼熱下流非寒也法當升陽散火乃進升柴羌活澤瀉等劑而繼以神芎丸郭曰予苦久泄今復利之恐非治也昕曰公六脈浮濡而弱且微數濡者溼也數者脾有伏火也病由溼熱而加以熱劑非苦寒逐之不可法曰通因通用吾有所試矣頃之利如木屑三四出卽去首氈次去熾炭疾旋已建康萬戶廉病醫溫之益劇昕曰此得之酒病當噦作聲

食入卽出而後洩不利廉曰然予素所嗜獨燒酒所進葛花解醒加黃芩飲二升許勢減眾醫以藥過寒交沮之听既論不協去卽歎曰實實而虛虛過二月當入鬼錄矣果然听所以知廉病者脈數且滑諸數爲熱滑爲嘔爲胃有物酒性大毒大熱而濟以熱劑是火其火也且洩秘爲陽結今皆反治故二月死也茶商李富人也啖馬肉過多腹脹醫以大黃巴豆治之轉劇听後至診之寸口脈促而兩尺將絕卽曰胸有新邪故脈促宜引之上達今反奪之誤矣急飲以涌劑且置李中座使人環旋頃吐宿肉仍以神芎丸大下之愈眾醫咸曰所不及也听於醫多如此官終行省臺掾性純孝侍疾治喪一如古禮亦喜辭章善音律工繪畫而獨以醫顯然能生人死而義不受報金或予以藥亦不責償也晚號抱一翁葛乾孫者長洲人字可久與餘姚滑壽伯仁皆與朱震亨齊名乾

孫父應雷得北方劉張之學於中州名醫而宦吳者乾孫體貌魁梧本好擊刺戰陣法後折節讀書兼通陰陽律秣星命之術屢試不偶乃傳父業然不肯爲人治疾或施之輒著奇效富家女病四支痿痺目瞪不能食群醫罔治乾孫命悉去房中香奩流蘇之屬作地坎置女其中久之女手足動能出聲投藥一丸明日女從坎中出矣蓋女嗜香脾爲香食故也其奇中如此壽幼警敏能詩既學醫於京口王居中授以素問難經乃類次手鈔而讀之且爲之注已又參攷張機劉完素李杲三家之說得其妙又傳針法於東明高洞陽乃明人身自六脈各有繫屬外督任二脈苞乎腹背有專穴諸經滿而溢者此則受之合爲十四經由是所療無不奇效能決死生一婦孕患腹痛呻吟隔垣聞之曰此蛇妖也砭之產數蛇得不死壽無貧富皆往治不報不較也年七十猶童顏行步蹻

捷飲酒無算所至輒易名字在淮南曰滑壽吳曰伯仁鄞越曰櫻甯生櫻甯生晚所自號也朱震亨又有弟子曰王履崑山人字安道盡得震亨之術嘗謂傷寒論爲醫方祖後人不能出其範圍而少陰篇言胸背滿不言痛陽明篇無目痛太陰篇無噎乾厥陰篇無囊縮必有脫簡乃增損之復爲三百九十七法履工詩文兼善繪事嘗登華山絕頂作圖四十幅記四篇詩百五十首爲時所稱有問其畫何師曰吾師心心師目目師華山如是而已

呂復字元膺慶元鄞人也早受周易尙書稍習詞賦後以母病學爲醫久之益精能爲人診治無不效江浙平章左荅納失里病不睡睡則悸恐如敵環壘達旦耳目若聾瞶然雖堅卧密室曉未嘗交也更數醫不愈復切之左關之脈浮而虛察其色少陽之支外溢於目眚卽曰此得之膽虛而風因投禁方烏梅丸抱膽丸日再

服遂熟睡比寤病如脫因曰諸公止治其心耳郡人蘇伯友病衄浹旬不止眾醫以氣虛不統血日進溫補疾彌甚則延復復至未食頃其血已三覆器矣復切其脈兩手皆虛芤右上部滑浮數而躁且其鼻赤查而色澤卽告之曰此得之酒酒酒毒暴悍而風暑乘之熱蓄於上焦故血上行而淖溢蘇曰某嘗飢走赤日中已而醉酒向風卧也復爲作地黃汁三升兼用防風湯半劑飲之立愈普濟寺僧體無爲病歷已三日不知人復脈之右口之陽弦而遲少陰之脈堅而勁不滿四十動而止此寒邪乘於腎肝法當以甘辛復其陽爲作湯三升頓服遂起對客然復云一藏已絕去此若千日當死果死如其日帥府從事帖穆失爾病下利完穀醫咸謂洞泄寒中日服四逆理中輩彌劇復診其脈兩尺寸俱弦長右關浮於左關以倍其目外眚如草滋蓋知肝風傳脾因成殮泄非藏

寒也飲以小續命湯損麻黃加朮三五升利止續命非止利藥復以從本治故也道士蕭雲泉病兩目視物皆倒植復曰視一爲二視曲爲直古有之矣未聞其倒也雲泉曰某常大醉劇吐熟睡達旦遂病復脈之右關浮促餘皆無恙曰此當吐時上焦反覆致倒其膽耳遂授藜蘆瓜蒂俾平旦湧之遂再吐而愈純孝廟祝楊天成女在室病不月命婦人醫療之莫得其名狀漸腹如有娠復脈而目之因曰汝病非有異夢則鬼靈所憑耳女不答而入密語其侍姬曰我去夏追涼殿廡下薄暮過黃衣神夜卽入夢由是感疾我慚不敢以告人也姬以告復曰女面色乍赤乍白者鬼也脈乍大乍小者祟也乃飲以桃仁煎下血類豚肝者六七枚俱有竅如魚目病已帥府經歷哈散侍人病喘不得卧老醫爲服麻黃復脈之氣口大人迎倍厥陰弦動而疾兩尺短而離經因曰病蓋得之

毒藥動血以致胎死不下奔迫而上衝非風寒作喘也乃用催生湯倍芎歸服之果下一死兒喘止哈散密告曰病妾誠有懷以室人見如故藥去之人所不知也老醫慚而去郡守李孝文妻母龐病小腹痛醫以爲瘕聚也復脈之少陰如刀刃之切手胞門芤而數卽曰太夫人病在幽隱不敢以聞幸出侍人密語之乃出老姬復曰患者苦小腸癰以故臍下如瘕聚今膿已成迫於玉泉當不得前後溲溲則痛甚姬拜曰公何神也遂用國老將軍爲向導挾麒麟竭虎魄之類以攻之膿自小便潰應手愈趙氏子病傷寒餘十日身熱而人靜兩手脈盡伏醫以爲死也弗與藥復脈之三部皆無惟其口胎滑而兩顴赤如火語言不亂因曰此必大發斑周身如錦文夫脈血之波瀾也今血爲熱邪所搏淖而爲斑外見於皮膚呼吸之氣無形可依猶溝隧之無水雖有風不能成波也斑

消則脈出矣揭其衾而赤斑爛然卽用白虎加人參湯化其斑脈乃復常繼投承氣下之愈發斑無脈長沙所未論復蓋以意消息耳其鈞取古法動中肯綮皆此類也其論醫門羣經方論若內經素問靈樞本草難經傷寒論脈經脈訣病源論皆尋源溯流紬繹古說出以己意又言太始天元玉冊元誥元珠密語中藏經皆醫門依託也其評騰扁鵲倉公以下至李杲皆善形容復於經史傳記諸子雜家星緯律秣無不詳究故其見之語言文字皆有考據可徵詩尤雄健嘗以晦迹邱園薦爲仙居教諭調臨海又遷台州教授皆不上爲人恭勤詳緩晚號滄洲翁是時醫家皆尙劉張李之學吳人倪維德仲賢亦以當時習用裴宗元陳師文和劑局方故方新病多不合因改所習由是往往立效周萬戶子八歲昏眊不識飢飽寒暑以土炭自塞其口維德脈之曰此慢脾風也脾藏

智脾慢則智短以疏風助脾劑投之立愈顧顯卿右耳下生瘰大與首同痛不可忍維德曰此手足少陽經受邪也飲之藥驗月愈劉子正妻病氣厥不時哭笑人曰祟也維德脈之因謂曰兩手脈俱沈胃脘必有所積積則痛然乎曰然遂以生熟水導之吐痰涎數升而愈盛架閣妻左右肩臂奇癢延及頭面不可忍灼之以艾則暫止維德診之曰左脈沈右脈浮且盛此滋味過盛所致投以劑旋愈林仲實以勞得熱疾熱隨日出入爲進退暄盛則增劇夜涼及雨則否患此者二年維德曰此七情內傷陽氣不升陰火漸熾故溫則進涼則退投以東垣內傷之劑亦立愈維德常言劉張二氏多主攻李氏惟調護中氣主補蓋隨時推移不得不然故其主方不執一說因校訂東垣試效方並治眼科世多傳焉數人皆入明始卒均有著述在藝文志

周漢卿松陽人醫兼內外科針尤神鄉人蔣仲良左目爲馬所踉睛突出如桃他醫謂系絡已損不可治漢卿封以神膏越三日復故華州陳明遠瞽十年漢卿視之曰可針也爲翻睛割醫欬然辨五色武城人病胃痛奮擲乞死漢卿納藥於鼻俄噴赤蟲寸許口眼悉具痛旋止馬氏婦有娠至十四月不產冠且黑漢卿曰此中蠱非娠也下之有物如金魚痛良已永康人腹疾痾儂行漢卿解衣視之氣衝起腹閒者二其大如臂刺其一砉然鳴又刺其一亦如之加以按摩疾遂愈長山徐嫗癩疾手足顫掉裸而走或歌或笑漢卿刺其十指端出血而痊錢塘王氏女生瘰癧環頭及腋凡十九竅竅破白潘出將死矣漢卿爲剔竅母深二寸其餘烙以火數日結痂愈山陰楊翁項有疣如瓜大醉卧階下潰血不能止疣潰者必死漢卿以藥糝其穴血卽止義烏陳氏子腹有塊捫之如

罌漢卿曰此腸癰也用大針灼而刺之入三寸許膿隨針迸出有聲愈諸暨黃生背曲須杖行他醫皆以風治之漢卿曰血滯也刺兩足崑崙穴頃之投杖去其捷效如此

范思賢其先在宋時有爲防禦使用醫小兒名思賢其元孫傳其業甚精無貧富皆詣求治思賢務利人不務利於人名由是益顯所居錢塘城東有竹木禽魚之樂因自號東皋隱者

邱處機字通密登州棲霞人也自號長春子兒時有相者言異曰當爲神仙宗伯年十九學道於甯海崑崙山師事王嘉復出住磻溪龍門十有三年晚還海上金宋之季俱遣使來召不赴太祖十四年自乃蠻命近臣札八兒劉仲祿持詔求之處機一日忽語其徒使促裝曰天使來召我我當往翌日二人者至處機乃與弟子十有八人偕行明年宿留山北先馳表謝拳拳以止殺爲勸又明

年趣使再至乃發撫州過怯綠連行宮至和林復西行過金山經數十國爲地萬有餘里蓋蹀血戰場避寇叛域絕糧沙漠歷四載而始達雪山焉常馬行深雪中馬上舉策試之未及積雪之半旣見太祖大悅賜食設廬帳甚飭太祖時方西征日事攻戰處機每言欲一天下必不嗜殺人及問爲治之方則對以敬天愛民爲本問以長生久視之道則告以清心寡欲爲要太祖深契其言命左右書之且以訓諸子焉於是錫之虎符副以璽書惟曰神仙不斥其名也一日雷震太祖以問處機對曰雷天威也人罪莫大於不孝不孝則不順乎天故天威震動以警之似聞境內不孝者多陛下宜明天威以導有衆太祖從之俄太祖大獵於東山馬踣處機請曰天道好生陛下春秋高數田獵非宜太祖爲罷獵者久之遂乞東還十九年至燕時國兵踐蹂中原河南北民罹俘戮無所逃

命處機使其徒持牒招求由是奴得復爲良與瀕死而更生者母慮二三萬人中州人常稱道之明年熒惑犯尾其占在燕處機禱而退舍二十二年又爲旱禱期以三日雨當名瑞應已而亦驗太祖爲改賜宮名曰長春且遣使勞問曰朕常念神仙神仙無忘朕也是時太祖在西夏也六月浴於東溪越二日天大雷雨太液池南岸崩水入東湖聲聞數十里魚鼈盡去池遂涸北口山亦摧處機歎曰山其摧乎魚池其枯乎吾將與之俱乎逾月遂卒年八十八是月太祖亦崩處機弟子尹志平等世奉璽書襲掌其教四傳至祁志誠居雲州金閣山丞相安童嘗過訪焉志誠告以修身治世之要安童領服其言其後安童自朔方歸再入相復訪於志誠志誠曰昔與子同列者何人今又何人安童大悟入見辭曰臣昔爲宰相年尙少幸不失陛下者丞佐皆臣所師友也今事臣者皆進

與臣俱則臣之不能可知也已世祖曰誰謂卿言是對曰祁真人世祖歎異者久之後其徒苗道一嗣其教

張宗演信州貴溪人也自言漢道陵三十六代孫世居龍虎山道俗美之號曰天師所傳有正一經至元中世祖已定江南遣使召宗演至則命羣臣郊勞待以客禮及見語之曰昔朕次鄂渚嘗遣使往訪卿父卿父報朕以爲後二十年天下當混一今驗矣因命坐錫宴特賜玉芙蓉冠組金無縫服仍號之天師命主領江南道教仍賜銀印命取其祖天師所傳玉印寶劍觀之語侍臣曰朝代幾更而劍印傳至今日其果有神明相之乎因特建天師祠於京師命宗演居之踰年請還山二十九年卒子與棣嗣卒元貞元年弟與材嗣時海水齧鹽官海鹽兩州爲患特甚與材請咒之一夕大雨震電明晨見有魚首龜形者磔於水裔潮遂息大德八年授

正一教主主領三山符錄武宗卽位特授金紫光祿大夫封留國公賜金印延祐二年卒子嗣成嗣加太虛輔化體仁應道大真人掌道教如故其後至正十二年張嗣德復嗣焉張留孫者字師漢張宗演弟子也從宗演入朝應對稱旨命留侍焉授江南道教提都點世祖嘗親祠幄殿皇太子侍忽風雨暴至眾駭懼留孫禱之立止又嘗次日月山皇后得疾危甚急召留孫請禱已而后夢有朱衣長髯從甲士導朱輦白獸行草間覺而異之以問留孫對曰甲士導輦獸者臣所佩法籙中將吏也朱衣長髯者漢祖天師也行草間者春時也其及春而瘳乎后命取所記畫像進果夢中所見也帝大悅欲命爲天師留孫固辭不敢乃號爲上卿命尙方鑄寶劍以賜建崇真宮於兩都使居之專掌祠事復授元教宗師賜銀印又特官其父至同知江東宣慰司事時天下大定世祖思與

元書 卷九十五
民休息留孫每侍因論黃老治道貴清靜聖人在宥天下之旨帝
意深契焉大德中加同知集賢院道教事號元教大宗師追封其
三代皆魏國公官階品俱第一武宗初召見賜坐進號大真人知
集賢院位大學士上尋又加特進進講老子推明謙讓之道仁宗
卽位加開府儀同三司謂近臣曰累朝舊德惟存張上卿耳加號
輔成贊化保運元教大宗師授玉印至治元年卒天祿初追贈道
祖神應真君其徒吳全節嗣全節字成季安仁人從留孫見世祖
成宗初命侍從行幸所司給廬帳車馬衣服廩餼大德十一年授
元教嗣師賜銀印至大中賜七寶金冠織金文服祖父皆贈大官
名所居鄉曰榮祿里曰具慶至治初旣嗣職制授特進上卿元教
大宗師崇文宏道元德廣化真人總攝江淮荆襄等處道教知集
賢院道教事玉印一銀印二竝授之泰定三年命修醮事於龍虎

三茅閣皂諸山生平好與賢士大夫交其推轂善類振窮救急頗
有俠槩卒年八十二其徒夏文泳嗣元世道流名者復有褚志通
張志清李居壽

褚志通字伯達幼業儒後從雲臺宮道士劉真常受學真常歿志
通遂徙上方上方非鐵絙不得上下志通不以爲艱險然須備糗
糧爲禦冬計一歲偶未集而冰雪已封山遂減食服氣爲胎息明
年山門開弟子往哭求其尸而志通步履話言不衰往時弟子雖
神之而苦請其出山志通又徙之牛心谷或勸留弟子一人自佐
曰吾居此樂彼居此戚強留要終相棄吾約非春糧採薪不至絕
而繼具而去亦古之君子以人望人不竭忠也自後常十月還雲
臺二月之谷性嗜讀書熟左氏博議有饋名酒者輒沈罌泉中時
依林坐石引瓢獨酌夜常有虎跡縱橫樊垣外志通起行庭中如

不覺也若有樵獵入山責之具炊寢則假榻志通無難色忿言若職宜然問以姓名則不答姚燧提舉陝西學校嘗造焉告以人開事噤不應叩以山中樂事則必舉好石幽樹佳泉危棧以對以爲好游者先導也安西王相李德輝亦善之世祖聞其名賜號佑德真人提點嶽祠灑靈宮復內出鈔萬八千緡爲完葺嶽祠費志通易敝爲新煥然改觀人始知其有應務之才而韜之幽秘也至元十六年詔中使起之辭疾不至年幾大耋卒姚燧以爲太華真隱云

張志清事親孝耐勞苦制行堅峻初金季道士劉德仁立教以苦節危行爲要五傳至酈希誠居燕天寶宮見知憲宗始名其教曰真大道教授希誠太元真人領教事世祖時命其徒孫德福領諸路真大道教賜銀印又三傳而至志清授演教大宗師凝神冲妙

元應真人東海舊多虎志清往結茅居之虎皆徙避然頗爲人害志清曰是吾奪其所耳遂去之後居臨汾地大震城郭廬舍摧壓死者不可勝計獨志清所居裂爲二無少損志清乃徧巡木石間聽呻吟聲救出者甚衆朝廷重其名給驛致之掌教事志清辭傳徒步至京師深居簡出人或不識其面貴人達官來見率告病伏卧內不起至有道名公則納屣求見不以爲難時人高其風至畫爲圖以相傳焉

李居壽蕭輔道弟子也初金道士蕭抱珍傳太一三元法籙之術因名其教曰太一四傳至蕭輔道世祖在潛邸聞其名命史天澤召至和林留居潛邸以老請授居壽掌其教事至元中建太一宮於兩京命居壽居之領祠事且禋祀六丁以繼大保劉秉忠之術賜太一掌教宗師印嘗以月值元辰命祠醮奏赤章於天凡五晝

夜事畢居壽請閒曰皇太子春秋鼎盛宜參預國政又因典瑞董文忠以爲言世祖喜曰行將及之其後詔太子參決朝政庶事皆先啓後聞者蓋居壽爲之先也

膽巴一名功嘉葛刺思西番朵甘思旦麻人也幼從西天竺古達麻失刺傳習梵祕得其法要世祖初帝師入思巴薦之入思巴在土蕃傳是時懷孟大旱世祖命禱之立雨又嘗呪食投龍湫頃之奇花異果上尊湧出波面取以上進世祖大悅初桑哥嘗爲膽巴弟子及貴顯諱言師膽巴後爲尙書右丞相益忌之膽巴知之力請西歸桑哥以帝命召之還而謫之潮州是時月的迷失以樞密副使鎮潮其妻得奇疾膽巴爲治之疾良已又嘗爲月的迷失言異夢及已還朝期後皆驗元貞閒海都犯西番界成宗命禱於摩訶葛刺已而捷書至又爲成宗禱疾遄愈賜與甚厚且詔分御前

十人爲之導從成宗北巡命膽巴以象輿前導過雲州語諸弟子曰此地有靈怪恐驚乘輿當厭之無何風雨果大至眾咸震懼惟幄殿無虞復賜以碧鈿盃大德七年卒皇慶閒追號大覺普惠廣照無上帝師

楊連真珈西番人也未詳其所由進至元十四年世祖用爲江南釋教總統及桑哥專政相與表裏怙恩橫肆威燄灼人窮驕極淫不可具狀初杭城有天長寺乃宋魏王墳寺寺僧陰獻之楊連真珈卽發王家多得金玉心豔之遂盡發宋諸陵寢並焚其齒雜置牛馬枯骼中建白塔於杭故宮以厭勝之名曰鎮南塔杭民皆悲戚不忍仰視唐珏林景熙頗收得其遺骨葬之事在隱逸謝翱傳於是帝詔以宋陵冢所得金銀寶衣修天衣寺楊連真珈又發錢唐紹興大臣冢墓凡一百一所又言會稽爲秦甯寺宋毀之以建

甯宗攢宮錢唐有龍華寺宋毀之爲南郊皆勝地也宜復爲寺爲上祈壽帝從其請發諸衛軍六千八百人代其營造二十二年朝命復以江南廢寺土田悉付修寺又命遣發宋宗戚謝儀孫全允堅趙沂趙泰等入京師已又從其言大毀宋宮室爲塔寺由是益橫恣戕殺平民受獻美女無算遂至攘民田畝盜取金銀珠玉以數千萬計二十八年坐侵盜官鈔十一萬六千二百錠田二萬三千畝私庇平民不輸公賦者二萬三千戶詔逮問籍其田廬妻子南臺中丞亦力撒合請急誅以謝天下帝不允尋且釋之並給還其人士仍錄其子宣政院使暗普爲江浙左丞後以民怨騰沸乃罷之時江南民五十餘萬楊連真珈皆籍爲佃戶成宗大德二年從省臣言始放爲民

必蘭納失里初名只刺瓦彌的理畏吾兒哈密力人也幼熟畏吾兒文字及梵書長能通貫三藏暨諸國語大德六年命從帝師受戒於廣寒殿代帝出家始賜名必蘭納失里言毘盧佛威也初諸髡徒恃國威放誕無忌自至元後益肆至大初上都開元寺西僧強市民薪民訴諸留守李璧璧方詢問而僧黨持白梃入公府摔壁髮仆之地捶扑交下拽以歸閉諸空室久乃得脫奔訴於朝遇赦竟免未幾復有僧龔柯等十八人與諸王合兒八刺妃爭道拉妃墮車且毆之事聞詔釋不問而宣政院方奏取旨毆西僧者截其手詈者斷其舌時仁宗爲皇太子亟奏寢其令數年仁宗卽位而必蘭納失里以繙譯諸梵經典賜銀印授光祿大夫是時諸番方朝貢表箋無能識者皆令必蘭納失里譯其文以進嘗有以金刻字爲表者帝遣視之必蘭納失里隨取案上墨汁塗金葉審其字命左右執筆口授表中語及使人名字與貢物數上之明日有

元書 卷九十五
司閱其物色與其所譯書無少差眾服其博識而竟莫測其從來也於是授開府儀同三司仍賜三臺銀印兼領功德使厚其廩餼俾便養母至治初復命爲諸國引進使改賜金印號曰沙津愛護持言教寬闊也又逾二歲西臺御史李昌上言嘗經甘涼靜會定西等州見西僧佩金字圓符絡繹道塗馳騁累百傳舍至不能容則假館於民因迫逐男子奸污婦女奉元一路自正月至七月往返百八十五次用馬至八百四十餘匹較之諸王行省之使十多六七驛戶無所控訴臺察莫敢誰何竊謂國家之制圓符本爲邊防警報之虞僧人何事而輒佩之乞更正其法並令臺憲得以糾察不報至順二年又賜必蘭納失里玉印加號普覺圓明廣照宏辨三藏國師然亦大貪悖明年坐與安西王子月魯帖木兒謀逆誅死有司籍之得其人畜土田金銀貨貝錢幣邸舍書畫器玩及

婦人七寶裝具價值鉅萬萬云然元本崇釋教自至元以來日以寢盛大德時立功德司費已數倍至元其後僧徒貪利無厭營結近侍奏請布施在延祐時又復數倍大德又每歲必因佛事奏釋重囚以爲福利至殺人之盜作奸之徒亦因幸免其後益恣朝廷亦信尚之故僧徒恃寵惡濫無若元也而僧有曰禪曰教曰律又有所謂白雲宗白蓮宗者業不同而嗜利無異焉

大訖南昌人陳氏子也少有文學忽棄家爲浮屠誨機問曰黃龍向泐潭得旨領徒游方及見慈明氣索汗下過在甚處訖云千年桃核裏覓甚舊時仁出世吳興烏回遷鳳山中天竺博通經典旁及道流之說然訖意實主儒學文宗自建康登大位以其潛邸爲龍翔集慶寺聞訖名召使住持授以大中大夫主寺事奉敕重校百丈清規自號笑隱居士十年卒至正四年賜諡廣智全悟大禪

師大訢文辭具有典則詩軒昂淹雅足揖讓士大夫閒故多與趙孟頫柯九思薩都刺高克恭虞集馬臻張翥李孝光往來酬酢虞集又爲其蒲室集作序盛稱之又嘗代趙孟頫作寺院記銘元代僧文采惟大訢云

珈璘真亦西番僧也善秘密術時合麻薦西天僧於帝僧善運氣術號演揲兒法猶言大喜樂也帝習之大悅至正十三年禿魯帖木兒復陰薦珈璘真於帝謂帝曰陛下雖尊居萬乘富有四海不過有見世而已人生能幾何當受此大喜樂禪定帝又習之亦名雙修法曰演揲兒曰秘密皆房中術也帝乃詔以珈璘真爲國師西天僧爲司徒取良家女奉之謂之供養於是帝日從事於其法而使禿魯帖木兒等用高麗女爲耳目刺探貴人及士庶室家美而善淫者媒入宮中數日乃出又選采女爲十六天魔舞八郎帝

諸弟與合麻禿魯帖木兒等十人號倚納赤皆在帝前相與褻狎甚至男女裸處號所處室曰皆卽兀該言事事無礙也帝復大興布施歲增金三十八錠銀三百三錠緡帛六萬一千餘匹撥山東地十六萬二千頃賜之爲永業帝由是荒樂不聽朝政羣盜四起以訖於亡

阿尼哥扮卜國人也幼敏悟異凡兒稍長習佛書期年能曉其義同學有爲繪畫妝塑業者讀尺寸經阿尼哥一聞卽能記誦遂善其業中統初世祖命帝師八思巴建黃金塔於土蕃從扮卜選匠百人阿尼哥年十七與焉八思巴一見奇之以爲監役明年塔成請歸扮卜八思巴勉以入朝乃祝髮受具足戒爲弟子從八思巴入見帝視之久問曰汝來大國得無懼乎對曰聖人子育萬方子至父前何懼之有又問汝來何爲對曰臣家西域奉命造塔土蕃

二載而成見彼土兵難民不堪命願陛下安輯之故不遠萬里爲生靈來耳又問汝何所能對曰臣以心爲師頗知畫塑鑄金之事帝命取明堂針灸銅像示之曰此安撫王楸使宋時所進歲久闕壞無能修者汝能新之乎對曰臣雖未嘗爲此請試之至元二年新像成關鬲脈絡皆備金工歎其天巧莫不愧服於是多領工作凡兩京寺觀之像率出其手爲七寶鑲鐵法輪車駕行幸用以前導原廟列聖御容織錦爲之圖畫弗及也至元十年始授人匠總管銀章虎符十五年詔返初服授大司徒領將作院事寵遇賞賜無與爲比卒贈太師開府儀同三司上柱國諡曰敏慧子阿僧哥位至大司徒阿述臘諸色人匠府達魯花赤劉元者寶坻人始爲黃冠師事青州杞道錄傳其藝非一後從阿尼哥學西天梵相能爲搏換搏換者漫帛土偶上而髹之已而去其上髹帛儼然成像

也元所爲像神思妙合天下稱之其上都三皇尤古粹識者以爲造意得三聖人之微仁宗兩賜宮女爲妻命以官長其屬行幸必從嘗敕元非有旨不得爲人造像後大都南城作東域嶽元爲造仁聖帝像巍巍然有帝王之度其侍臣乃若憂深思遠者始元欲作侍臣像久之未措手適閱秘書圖畫見唐魏徵像巽然曰得之矣非若此莫稱其相臣也遽走廟中卽日成之觀者莫不歎異其所爲西番佛像多秘人罕得見者元官爲昭文館大學士秘書卿以壽終

阿老瓦丁亦思馬丁皆回回氏西域人也世祖徵礮匠於宗王阿八合阿八合以二人應詔因舉家馳驛至京師給以官舍首造大礮豎於五門前帝命試之各賜衣段國兵渡江行省阿里海牙遣使求礮手命阿老瓦丁往潭州靜江之破悉賴其力授管軍總管

命屯田南京改回回礮手軍匠副上萬戶卒子孫皆襲其職亦思馬丁從國兵攻襄陽相地勢置礮於城東南隅機發聲震天地所當無不摧者樊城竟以此克以功爲回回礮手總管佩虎符卒子布伯襲布伯豎礮江北岸擊宋人南岸下舟舟多沈沒以功佩三珠虎符加都元帥改軍匠萬戶遷刑部尚書以其弟亦不刺金爲萬戶而遷布伯浙東宣慰使賜鈔二萬五千貫俾養老焉

論曰李延壽言術者厚誣天道變亂陰陽往往身罹災毒莫得壽終又曰通方術而不詭於俗習伎巧而必蹈於禮幾於大雅君子矣由前之說則必蘭納失里沙津愛護持其人也而楊連真珈璘眞之屬雖未就戮亦幸之幸矣由後之說則田忠良靳德進張康傅立李杲呂復邱處機褚志通祁志誠張志清諸人亦其選也大訢以文著矯矯不羣宗演留孫膽巴亦多術矣劉元學於阿尼

哥而心契魏徵之像元矣哉阿老瓦丁以善礮聞亦兵家之急也

尹策園 刊

劉世昌 刊

門人曾廣纓襄校

門人曾士琮詳校

元書卷九十五

元書卷九十六

邵陽曾廉撰

權倖列傳第七十二

太史公傳佞幸曰非獨女以色媚也仕宦亦有之而宋書則易曰
 恩倖多列寒人矣其後南北史有紀僧真劉係宗施文慶沈客卿
 王叡王仲興趙修茹皓和士開及魏齊諸宦者之屬亦至糾紛矣
 哉此非徒仕途之捷足抑亦太官之竊脂也蓋孟子曰目之於色
 也耳之於聲也口之於味也鼻之於臭也四肢之於安佚也性也
 有命焉仁之於父子也義之於君臣也禮之於賓主也智之於賢
 者也聖人之於天道也命也有性焉人受天地之中以生五官百
 體無不具斯五常之性無不同故有物有則惟聖人而後可以踐
 形有嗜欲而不任嗜欲之謂也故曰非無色耳非無聲口非無味

元書 卷九十六
鼻非無臭四肢非不安佚而仁義禮智天道由之下此者則縱嗜欲而耳目口鼻手足皆爲之累矣故齊宣王曰寡人有疾寡人好貨又曰寡人有疾寡人好色天下有二大惑而貨與色惟均記曰飲食男女人之大欲存焉謂色與貨也聖人知性而不恃命故因飲食而制爲食饗之禮紵兄之臂而奪之食必不爲也因男女而制爲婚姻之禮踰東家牆而摟其處子必不爲也恒人恃命而不知性則葛伯殺童子而奪其餉黍陽侯殺繆侯而竊其夫人何其昏昏至於此哉嗜欲之開不可禁矣故曰差之毫釐失以千里蓋非獨上智與下愚之異也固有雄猜之主文察之君自以爲智周萬物威加百夷往往張目而受其惑何則非貨色之能惑人人心之惑也是故嗜欲可通也而不可徇也通嗜欲則周之公劉太王是也徇嗜欲則三代以下之人君多矣因嗜欲而愛幸生矣始於

愛幸必終於弄權片言之假借可以沸四海之波一息之昧眇可以制萬物之命又况其不惜傾天下而付之者乎卒至壅蔽聰明忠諫路絕禍鍾氓庶人戶流亡鹿挺無所盜賊滋興遂乃顛國家之刑賞恣私人之恩讎而國祚移矣豈不哀哉元家先時以色幸者無聞其後乃有鐵木迭兒蹈王叔之醜哈麻雪雪襲趙修之佞而王文統阿合馬盧世榮桑哥脫虎脫三寶奴蓋文慶客卿之亞而寵遇崇高過之古未有處賈豎如此者也至於忙哥撒兒燕鐵木兒伯顏未嘗不精果膽決而以恩舊冒不韙以邀援翼之功其希恩攬權一也皆徇嗜欲之過也極其至則妻帝女而不饜其色之欲貴爲天子富有天下而亦不饜其貨之欲也是故以世祖之威明而蔽以武仁之仁厚而蔽况已無君父亦悅人之無君父則是導人以無君父也亦焉得必目己爲君父哉又况乎亡國狂主

元書 卷九十六
罔罔盤樂佚傲以天下爲戲者乎故搆思監才譎益下蓋等於自
鄙而與宦官相表裏以蹙其國跡其行事蓋大臣之所不爲而奸
臣之所不屑出也故皆以權倖名之而從南北史以宦者附焉燕
鐵木兒以與逆別入亂臣傳云

忙哥撒兒察哈札刺兒氏曾祖赤老温愷赤孔温窟哇之弟也祖
搆阿與木華黎爲從兄弟父阿海舉家並事太祖甚著戰功忙哥
撒兒早事拖雷太子太宗時常從攻鳳翔憲宗以親藩出征西域
忙哥撒兒復從之嘗以身先諸將憲宗與相親信使治藩邸事忙
哥撒兒贍猛好折人短雖至親皆嚴憚之憲宗以爲藩府札魯花
赤定宗既崩欽淑皇后以太宗遺命擁失烈門太后臨朝初太宗
與察合台太子議各以長子主兵太宗以定宗朮赤太子以拔都
察合台太子以也速蒙哥拖雷太子以憲宗同出西征定宗與也

速蒙哥嘗毀辱拔都拔都遣使白諸太宗太宗怒定宗不敬其兄
命拔都懲之由是定宗與拔都不洽定宗之立拔都以速不台之
言始來會及欽淑皇后稱制尤非拔都意也忙哥撒兒及兀良合
台皆憲宗私黨欲立之遂與憲宗弟旭烈兀末哥阿里不哥定計
徵諸王大將大會拔都遂定議立憲宗其時欽淑皇后遣使巴剌
亦在坐以太宗命爲辭忙哥撒兒亦舉太宗之言以塞之巴剌不
能對語在憲宗紀憲宗既立以爲忙哥撒兒潛邸舊臣又多擁護
之力遂拜爲也可札魯花赤當是時也可札魯花赤官甚尊猶漢
之大將軍也忙哥撒兒既拜命出帳殿外欹橐坐熊席其僚坐左
右四十人因問曰主上以我爲此官請公爲我言何以稱職皆默
然有夏人和幹居下坐進曰夫札魯花赤之道猶宰之刲羊也解
肩者不使傷其脊在持平而已忙哥撒兒卽起入帳眾頗咎和幹

元書 卷九十六 三
失言忙哥撒兒實善和幹之言而告於帝帝召和幹才之和幹由是知名然忙哥撒兒自是遂逞威福也速蒙哥不平憲宗之奪失烈門位也始遷延不與會已而復結朝臣野里知吉帶等爲應因稱來朝而刳車轆藏兵其中以入忙哥撒兒覺其變卽發兵迎擊悉禽之帝卽命忙哥撒兒治其獄忙哥撒兒遂盡誅野里知吉帶也孫脫暢吉爪難合荅曲憐阿里出剛疙疸阿散忽都魯等皆意在太宗子孫者也獄竟也速蒙哥以懿親與失烈門俱安置脫火赤於是帝益嘉忙哥撒兒能奉法委任益專忙哥撒兒輒用峻刑以威翼議每奏帝無不報可者帝或卧不起忙哥撒兒入奏事至帳前叩箭房帝問何言卽可其奏以所御大帳行扇賜之其見親寵當時無與爲比而怨讟載道矣忙哥撒兒旣顯國遂極意酒色三年病酒而薨忙哥撒兒爲人有膽勇無所不敵而性慘覈帝以

翊戴功待以殊禮多肆殘虐任意誅戮諸王駙馬俱多憤恨而畏憲宗不敢明言而陰詛祝焉其後海都蔑里遂雄據朔方皆由此也然憲宗甚痛惜之又以彌縫已失乃詔諭其子略曰汝高祖赤老溫愷赤及汝曾祖搠阿事我成吉思皇帝皆著勞烈惟朕皇祖實褒嘉之汝父忙哥撒兒自其幼時從我皇考經營四方迨事皇母及朕兄弟皆罔有過咎暨朕討定斡羅思阿速穩兒別里欽察之域濟大川造方舟伐山通道攻城野戰功多於諸將俘厥寶玉大賚諸將則退然無欲得之心惟朕言是用修我邦憲治我菟田輯我國家罔不咸乂惟厥忠雖其私親與朕嬪御小有過咎一是無有私比故朕皇妃及朕兄弟無不嘉賴朝之老臣宿衛耆舊無不嚴畏錄其勤勞命長札魯花赤治朕皇考受民布昭大公以辨獄慎民爰作股肱耳目眾無譁言朕聽以安自時厥後察合台阿

哈之子孫太宗之裔定宗曲出之子及其民人越有他志賴天之靈時則有克薛傑者以告於朕汝父肅將大旅以遏亂略野里知吉帶等謀自用潰悉就拘執朕取有罪者使辨治之汝父體朕之公其刑其宥克比於法又使治也速孛里獄亦克比於法惟爾脫歡脫兒赤白朕用汝父用法不阿兄弟親姻咸麗於憲今眾罔不怨曰爾亦有死耶若有慊志人則雖死朕將寵之如生今朕訓汝爾克明時朕言惟天惟君能禍福人惟天惟君是敬是畏立身正直制行貞潔是汝之福反是勿思也能用朕言則不墜汝父之道人亦不能開汝矣不用朕言則人將仇汝何汝聞汝怨汝父者必曰汝亦與我夷矣汝則殆哉又而母而婦有讒欺巧佞構亂之言慎勿聽之則盡善哉也速孛里即也速蒙哥也忙哥撒兒之爲時所怨至不見信於妻子如此惟憲宗以其附己任之至順四年追

封爲充國公孫伯蒼沙別有傳

王文統字以道益都人也少時習權謀書好以言撼人徧干諸侯皆畏其巧詭莫敢近乃往見行省李壇壇與語大喜卽留置幕府命其子彥簡師事之文統亦以女妻壇由是軍旅之事咸與諮議歲上戰功虛張敵勢以固其位用官物樹私恩取宋漣海二郡皆文統謀也世祖在潛藩嘗攻鄂宋制置使賈似道作環城木柵一夕而成世祖亟激賞之劉秉忠張易進曰山東王文統才智士也今爲李壇幕僚世祖卽心識之及卽位召入見大親幸中書省立首擢平章政事元家自太祖以來諸事草創設官甚簡帝命劉秉忠及許衡創定內外官制以中書總政務建元爲中統立十路宣撫司文統果銳能行之始造交鈔以絲爲本立互市於潁州漣水光化軍其歲世祖親擊阿里不哥於北方凡民間差發宣課鹽鐵

元書 卷九十六 五
一委文統文統作爲條格以爲欲差發辦而民不擾鹽額不失常額交鈔無致阻滯頃之復造中統元寶鈔自十文至二貫凡十等不限年月諸路通行稅賦並聽收受事具食貨志明年二月世祖在開平召行中書省事馮禡與文統率各路宣撫使俱赴闕考議得失責以成效卽以文統條格詔各路通行並申嚴私鹽酒醋麩貨等禁文統爲人才思縱橫而中忌刻覷郝經有重望當入相會使宋乃陰嗾李璫用兵宋境以敗其成又張文謙爲左丞同居政府文謙素志安國利民文統一意聚斂欲以逢君故講論建明多相可否文統輒思有以陷之文謙遂以本官出行大名宣撫司事而姚樞竇默許衡皆世祖所敬信者也以文統非才皆不善其所爲而默之爭尤力嘗上書斥文統爲蘇張之流又嘗在世祖前面詆文統學術不正必禍天下文統大患之因乘閒諷世祖拜樞爲

太子太師默爲太子太傅衡爲太子太保陽爲尊禮實不欲使朝夕備顧問於左右也文統爲相未盈二歲天下大權悉在其手忠賢多爲所傾識者憂之三年李璫反文統嘗遣其子蕘與璫通謀世祖親問之曰舉世皆知汝教李璫反久矣汝策云何也文統因言苟全螻蟻之命保爲陛下取江南世祖曰汝今日猶欲緩頰於朕耶會人持文統與璫三書自洛水至示之文統始錯愕駭汗書有期甲子語世祖窮詰之對曰璫久欲反畏臣居中耳臣以北方未靖故未卽爲陛下言比及甲子猶可數年臣以是遲其反期也帝以其辭多枝不自伏罪命出就縛趣召姚樞王鶚等議之皆曰當死遂竝薨皆伏誅帝恐文統爲宰相被極刑時或未喻詔諭天下焉

阿合馬回回人也不知其所由進中統三年王文統誅遂以言財

利得幸其冬立中書左右部以阿合馬領之兼諸路都轉運使奏降條畫宣諭各路運司阿合馬始以鹽鐵小利動上而鑄農器易粟世多譏笑之世祖以爲能至元元年罷左右部併入中書阿合馬遂超拜平章政事三年特立制國用司阿合馬以平章政事領之然是時安童爲右丞相史天澤耶律鑄皆班在上阿合馬欲有所專輒不能徑行其私徐諷帝立尙書省七年遂罷制國用司以阿合馬平章尙書政事由是遂橫肆安童見其逞欲無厭含容久之乃啟於帝曰臣近言尙書省樞密院御史臺宜各循常格奏事其大者從臣等議定奏聞已有旨俞允今尙書省獨不之從何也帝曰阿合馬敢如此耶初立尙書省時詔凡銓選各官吏部擬定資品呈尙書省尙書咨中書聞奏阿合馬擢用私人不由部擬亦不咨中書安童以爲言帝問之阿合馬對曰臣所用人臣宜自擇

帝亦從之阿合馬旣蒙帝寵任大結黨援又恃其巧佞足折人遂視安童以下蔑如也九年遂復奏併尙書省入中書改平章中書政事而大權獨操矣忽辛者其子也阿合馬以爲大都路總管兼大興府尹安童乃言大都總管以下多不稱職乞選人代之又言阿合馬張惠挾宰相權爲商賈以網羅天下大利厚毒黎民民困無所訴阿合馬曰誰爲此言臣當與廷辨安童進曰省左司都事周祥中木取利罪狀明白世祖曰若此者徵畢當顯黜之亦不責阿合馬也阿合馬遂深恨安童會北平王那木罕出鎮北邊乃言安童可爲良佐遂出之伯顏伐宋已渡江奏捷世祖命阿合馬與姚樞徒單公履張文謙陳漢歸楊誠等議行鹽鈔法於江南及藥材事樞公履皆言交會不可易文謙言宜令伯顏酌之漢歸誠言以中統鈔易之何難之有阿合馬言行之無疑帝曰朕嘗問陳巖

嚴言宋交鈔當速易也宜如汝言阿合馬又言北鹽藥材樞公履言可聽民販鬻臣恐紊亂不一請於南京衛輝等路籍括藥材發鹽十二萬斤官自貿易帝以爲善又言比因軍興後減免編民征稅又罷轉運官令諸路總管府兼領課程以致國用不足因請立都轉運司以亦必烈金札馬魯丁張景富珪蔡德潤紇石烈亨阿里火者完顏迪姜毅阿刺瓦丁等爲使量增課程元額鼓

鑄鐵器官爲局賣禁私造銅器初憲臺之立阿合馬以不便其私計請罷之以廉希憲之言而止後又請罷按察司以玉昔帖木兒之言而止至是以世祖之言宜廣儲積遂奏言自今御史臺非白省毋擅召倉庫吏毋究索錢穀數及集議中書不至者罪之於是臺察比於省屬矣其後又奏立江西權茶運司能杖責州縣又立諸路轉運鹽使司宣課提舉司官吏至五百餘人陳巖范文虎等

皆言其擾民且侵盜官錢阿合馬強辭詆之帝反爲之遣臺官同往體察焉阿合馬唯善窺帝意炫致富之術以結主知既出首輔安童威震天下於是貴賤奔赴其門公私剝削民不聊生百官有一言不合輒以計殺之或流竄左遷被害者不可勝計崔斌秦長卿論阿合馬最切死亦最免於是天下結舌而世祖與昂吉兒論相曰夫宰相者必明天道察地理盡人事也惟回回人阿合馬才堪任也其見信重如此故諸姦利事皆不得上聞雖聞輒解當是時耆舊如許衡廉希憲衡言其姦不聽希憲至以大姦爲憂而薨十九年世祖如上都皇太子從有益都千戶王著素疾惡因人心憤怒密鑄大銅鎚自誓擊阿合馬首與高和尚結黨八十餘人以三月戊寅詐稱皇太子還都作佛事竝矯令樞密副使張易發兵夜會東宮遂以夜二鼓召省官至東宮前僞太子立馬責阿合馬

元書 卷九十六
數語著卽牽去以銅鎚碎其腦立斃並殺左丞郝禎囚右丞張惠於是張九思高鰲開門大呼賊遂挺擊立馬者墜地高和尚逃去著挺身請囚世祖方駐蹕察罕腦兒事聞卽遣樞密副使孛羅司徒和禮霍孫討爲亂者獲高和尚於高梁河及王著皆醢之並殺張易著臨刑大呼曰王著爲天下除害今死矣異日必有爲我書其事者阿合馬死帝猶未深覺其姦及詢之孛羅乃盡得其罪惡始大怒曰王著殺之誠是也乃命發墓剖棺戮尸於通元門外縱犬啗其肉百官士庶聚觀稱快其歲詔以阿合馬罪惡頒告中外王惲曰著激於義捐一身爲天下除害事露自詣司敗臨刑氣不少挫視死如歸誠殺身成仁死而無悔者也律以春秋誅亂臣賊子之法不以義與之可乎忽辛始爲安童所論旣而樞密院奏以同僉院事世祖不允曰彼賈胡事猶不知况可責以機務耶其後

竟爲江淮右丞忽辛弟抹速忽爲杭州路達魯花赤而阿合馬兄弟子別都魯丁爲河南平章政事張惠新繁人初侍世祖潛邸累官參知政事行省山東有能名遷制國用司副使遂與阿合馬比厯尙書參知政事左右丞崔斌論列忽辛等罷之惠爲奏復其官至是被囚遂及參知政事阿里竝罷後惠至江淮平章政事竟以壽終而忽辛以罪逮問及抹速忽詔皆醢於揚州抹速忽弟阿散忻都與其弟宰奴丁及參知政事耿仁皆伏誅郝禎復戮尸禎仁皆阿合馬私人助虐者也阿里尋亦以黨籍其家

盧世榮大名人也初以賄阿合馬進得江西權茶運使後以罪廢阿合馬死廷臣亦諱言利無以副世祖意總制院使桑哥遂薦世榮有才術謂能救鈔法增課額也世祖召見悅之至元二十一年十一月召中書省臣與世榮議所當行丞相和禮霍孫守正不撓

遂與右丞麥朮丁參知政事張雄飛溫迪罕並罷於是以世榮爲右丞而安童復爲右丞相實則以世榮主中書也世榮遂薦史樞爲左丞不魯迷失海牙撒的迷失參知政事拜降參議省事諸宰執皆世榮一日所進阿合馬無此專帝欲見其速效卽日下詔中書整治鈔法徧行中外官吏奉行不虔者罪之世榮本欲以培克爲己功而懲於阿合馬之貪虐爲海內所疾怨因先言近見老弱廢疾之民行乞於市衣食不給非盛世所有宜委各路正官給之衣糧及請弛民間買賣金銀江湖采魚諸禁罷懷孟諸路竹監優卹驛戶困乏安童以其事非剝民卽偕入奏行之又言南北食鹽每引十五兩國家未嘗多取今官豪擁貨射利每引價至八十貫貧者多不得食宜以二百萬引給商以一百萬引散諸路立常平鹽局制其踴貴然世榮之爲人天下所共知以入中書未十日御

史中丞崔彧極言其不可爲相帝大怒下彧獄罷職世榮知帝意固遂言京師富戶釀酒價高味薄且課不時輸宜一切罷之官自酤賣明年正月世祖御香殿世榮入言天下歲課鈔止九十三萬二千六百錠以臣經畫不取於民可增三百萬錠事未行而中外已非議臣請與臺院面議上前帝曰卿但言之世榮言自王文統誅後鈔法虛敝已久今莫若依漢唐故事括銅鑄錢竝製綾券與鈔參行又宜立都轉運司於泉杭二州官自造船給本募人入番官取利七之商三之禁私航海者拘其先所蓄寶貨官買之匿者許告沒其財半給告者又國家雖有常平倉寶無所蓄宜盡核權勢所有鐵冶官爲鑄器鬻民以其息合常平鹽課儲穀於倉待貴時出糶則可均物價而獲厚利矣又國家雖有平準庫然無曉規運者以致鈔法虛廢諸物騰貴宜於各路立平準周急庫輕其息

以貧貧民則貸者眾而本且不失矣又今隨朝官吏增俸獨州郡無增可於各都立市易司領諸牙僧計土產物貨四十分取一以十爲率四給牙僧六充官吏俸又國家用兵不藉糗糧惟資羊馬宜於上都隆興等路以官錢買幣帛易羊馬於北方廣開牧地收其皮毛筋角酥酪以十之二給牧者而馬以備軍興羊以充賜予帝每事稱善世榮因奏曰臣所行怨之府也後必有陰中臣者臣竊懼焉帝曰疾足之犬狐不愛焉然主人豈不愛之未幾世榮遂奏升六部爲二品而罷行御史臺改按察司爲提刑轉運司使凡錢穀事者皆由部升省而以刑名隸內臺頃之御史臺言行臺不可輒罷按察司兼轉運則糾彈之職且廢丞相安童亦言其不可罷帝命復立江浙行臺治江州而按察司職掌如故世榮又奏立規措所所司官吏以善賈者充之且曰天下能規運錢者向在阿

合馬門今皆籍沒禁錮臣欲用之懼人言臣濫用罪人也帝曰惟其才也何懼爲於是以前轉運使張宏綱撤都丁不魯合散孫桓並爲河間山東都轉運鹽使其他擢用甚眾世榮旣以利自專知斂怨日甚乃以九事說世祖詔天下一免民間包銀三年二官吏俸毋令民戶帶納三蠲大都地稅四江淮民失業鬻妻子者官爲收贖五逃移復業者免差稅六鄉民造醋免收課七江南田佃主戶收租額減一分八添支內外官吏俸九定百官考課升擢法大抵欲釋怨邀譽以便行其私也已又奏立眞定濟南江淮等處宣慰司兼都轉運司專治課程仍降條格禁諸司不得擅追管課官吏按察司不得檢察文卷至以宣德王好禮爲浙西宣慰使帝曰好禮人多言其好世榮言彼自陳能歲辦鈔七十五萬錠是以令往世榮居中書數月始猶與安童議旣恃委任之專視丞相虛位

也左司郎中周敏議事稍不合卽坐以沮格詔旨奏杖而斬之朝中凜凜監察御史陳天祥上章論世榮姦邪不法狀時帝在上都御史大夫玉昔帖木兒以聞帝命世榮天祥並赴廷辨安童言世榮昔言能不取於民歲辦鈔三百萬錠令鈔復貴諸物悉賤民得休息數月卽有成效今所出多於所入又引用憸人紊亂選法請暴其罪於天下翰林學士趙孟頫等亦言世榮初以財賦自任當時人情不敢預料將謂別有奇術可增國用及今觀之不過如御史所言可復恣其妄行耶天祥與世榮面質帝前皆欵服詔誅之刳其肉以食禽獮

桑哥國師膽巴之弟子也能通諸國言語故嘗爲西番譯史爲人狡黠豪橫好言財利事世祖喜之及後貴幸乃諱言師膽巴並謫逐之至元中擢爲總制院使一日在世祖前論營息事稱旨遂諭

令桑哥具省臣姓名以進廷臣有所建置人才進退桑哥咸與聞焉盧世榮之進亦其所薦也世榮旣敗帝惟屬意桑哥二十四年復立尙書省遂以桑哥與帖木兒平章政事詔告天下尋改行中書省爲行尙書省六部爲尙書六部由是中書徒虛號而已是時鈔法本虛敝桑哥首議更定鈔法頒行至元寶鈔於天下以徐易中統鈔桑哥行事倣阿合馬而急暴過之亦欲立威以悚動一世會有詔檢覈中書省校出虧欠鈔四千七百七十錠昏鈔一千三百四十五錠卽坐參知政事楊居寬郭佑隳情旣毆辱而後奏誅之臺吏王良弼江甯縣尹吳德皆以偶語輒坐誹謗棄市由是天下不寒而栗然始猶少自戢後乘安童不在省卽奏以沙不丁遙授江淮左丞烏馬兒參知政事領泉府市舶事發鈔千錠給行泉府司歲輸珍異物爲息又以拜降爲福建行省平章政事俟旨已

允乃曰臣前言凡授省臣及行省官竝與丞相安童議今奏用沙不丁等適丞相還大都臣恐有言臣違失者帝曰朕若主也朕所允更何言乎帝欲極任桑哥因問翰林集賢諸臣漢唐有以丞相領尙書省乎咸曰有之翌日左丞葉李因薦桑哥可丞相帝大悅卽拜桑哥尙書左丞相兼總制院使領功德司事桑哥奏遣人行諸道宣慰司及路府州縣答責官吏稽緩誤事者以眞定宣慰使速克南京宣慰使荅失迷爲勲舊子請赦罷之又以甘肅參知政事鐵木哥不協力任事以乞牙帶代之又謂兵部尙書思都荅兒不勤職毆罷之而後奏其後淞江民曹夢炎願歲輸米萬石求官奏授浙東宣慰副使紹興判官白絜矩言江南亡宋族人宜悉徙京師奏擢尙書省舍人江西判官蕭儀受賅論死桑哥以儀嘗鈎考萬億庫工追比釋其罪其任情舉措如此安童以中書曠無事

遂請北征桑哥位百寮上惟專以理算爲事凡倉庫諸司無不鈎考先摘委六部復以爲不專乃置徵理司主之入倉庫者無不破產及當更代人皆棄家避之又上言荆湖行省錢穀已責平章政事要束木自首償矣乞命參知政事忻都尙書王巨濟等十二人理算江淮江西福建四州甘肅安西諸省特授敕印併給兵衛爲宣帝皆從之當是時桑哥威燄灼天下諛者遂諷都民爲之立石頌德帝遂聽之旣成樹於省前復命翰林爲之文題曰王公輔政之碑桑哥又以總制院所統西番諸宣慰使體甚重奏改爲宣政院秩從一品印三臺用銀復自請仍兼領之加開府儀同三司桑哥以爲鈎考將竟而國家經費太廣歲入恆不敷出因言今鹽課每引值中統三十貫可增爲一錠茶稅每引五貫可十貫酒醋稅江南可增額十萬錠內地五萬錠協濟戶十八萬止半賦今聞其

力已完足宜改爲全賦則國用可支矣帝皆從之又言有分地之臣近多以貧乏爲辭此希恩澤耳臣恐非慎財用之道也帝許其身自裁度桑哥既專政先時省部成案皆赴御史臺照刷至是遂言左右司文簿御史已稽照者遺漏尚多自今當令御史就省部稽察並書姓名於卷末徧否易知仍命侍御使監視之失則連坐從之乃答御史四人自是臺官氣茶而言路絕矣先是中書爲廢省猶主宣敕桑哥乃請宣敕並付尙書由是鬻官爵歿刑法珍寶日輸其門政令苟急天下手足不知所措二十八年春帝畋於柳林利用監徹里乘閒言其病國害民狀帝趣召不忽木問之對曰桑哥壅蔽聖聰紊亂朝政有言者卽誣以他罪而殺之今百姓失業盜賊蜂起召亂在旦夕非亟誅之恐爲陛下憂留守賀勝亦嘗陳其奸欺頃之言者益眾帝問御史大夫玉昔帖木兒曰屢聞桑

哥沮抑臺綱杜言者之口又嘗捶楚御史何也桑哥因誣臺官袒按察使只必賊私不答省檄先是桑哥令御史至省刷文卷至是臺臣及兩省官奉詔勘尙書卷則已折矣於是臺臣言文本在卷中而桑哥身爲宰相拆卷取去教吏爲奸奏上帝大怒下桑哥獄仆輔政碑未幾伏誅桑哥弟曰八由吉爲燕南宣慰使亦以積贓誅曰荅麻刺荅思爲鞏昌宣慰使桑哥特置是官處之位任總帥上及桑哥敗懼自殺要束木桑哥妻黨也初桑哥爲總制院使時已有寵至元二十三年營求鈎考湖廣錢穀中書擬卽授以平章政事帝曰要束木事朕五年一算理官足矣竟官平章要束木卽劾左丞阿里海牙贓穢會阿里海牙薨遂籍其家及桑哥爲丞相要束木有所恃尤昏黷事具烏古孫澤傳至後帝以哈刺哈孫爲湖廣平章政事卽命縛要束木至京師訊以不法數十事具服復

元書 卷九十六
械至湖廣誅之要東木妻也里失八子買驢英宗初爲江浙平章政事也里失八以暱於太后及御史大夫脫脫哈宣徽使失列門等謀逆誅死買驢被捕家籍而忻都王巨濟納速刺丁滅里稽誅桑哥死之明年御史大夫玉昔帖木兒中丞崔或同上疏曰納速刺丁滅里忻都王巨濟黨比桑哥恣爲不法楮弊銓選鹽課酒稅無不更亂理算江淮積逋期限嚴迫追逮騷民至嫁妻賣女殃及親鄰維揚錢唐受禍尤慘無故而殞其生五百餘人其初猶疑事出國家近按問首實士民乃知皆桑哥及其凶黨所爲莫不願食其肉請依論坐以謝天下於是詔誅之惟烏馬兒沙不丁竟賒死

脫虎脫不知其所由來武宗卽位爲宣政院使拜平章政事加太尉其歲十一月詔定中書省宰執爲十二員罷脫虎脫仍領宣政

院俄遙領右丞相方脫虎脫在中書帝患財用不足脫虎脫及平章政事教化法忽魯丁啓帝宜復立尙書省帝許之令自舉官屬賜之印已而御史臺臣言昔至元時阿合馬桑哥相繼立尙書省成敗何如陛下固知之矣又自大德以來地震水災歲頻不登百姓重困若復立之殊非益民之事也且爲政在人若付中書整飭未見不可臣等懼如至元時以不言獲罪不敢不言帝曰良然三臣者願任其事姑聽之然帝亦重其事未卽行也至大二年脫虎脫奏泉州大商進異木沈檀可爲宮室敕江浙行省驛致之未幾泉州商復進珍寶及寶帶西域名馬帝以其善營進奉益悅之八月遂復立尙書省以太傅中書右丞相乞台普濟徙尙書爲右丞相而脫虎脫爲左丞相先是武宗改鷹坊爲仁虞院秩正一品脫虎脫以遙授右丞相爲仁虞院使至是皇太子右衛率府立脫虎

脫兼府事尋大都城南建佛寺立行工部脫虎脫復兼行工部尙書脫虎脫既寵任日隆兼事東宮聲威益赫而諸尙書省臣相與和之欲盡籠天下貨利之權於是改造至大銀鈔立平準行用庫立常平倉立資國院於大都立泉府監於山東河東遼陽江淮湖廣川漢產銅之地立提舉司者十有九其時中書省方奏罷三宮內降旨所授官尙書省奏仍舊行之又言至元二十四年凡宣敕亦掌於尙書今臣等議乞從尙書省任人而以宣敕散官委之中書帝皆從之於是中書之政復悉奪歸其手矣尙書省甫立二月百官畏其薰灼不敢言惟御史臺臣頗言常平及銀鈔利弊帝復不聽於是右丞相乞台普濟乞骸骨去脫虎脫遂爲右丞相俄監修國史遂與左丞相三寶奴參知政事郝彬司徒田忠良議行郊祀之禮語在郊祀志二年詔脫虎脫及三寶奴總治百司庶務

賜二人珠衣遂停院臺選官悉歸尙書阿合馬桑哥所未嘗行也俄加脫虎脫太師錄軍國重事封義國公是時尙書省以武衛親軍都指揮使鄭阿兒思蘭與兄鄭榮祖段叔仁謀爲不軌置獄鞫之皆誣服十七人並棄市籍沒其家又言鎮南王老章僭用儀仗欲以罪之以爲能用法也然自立尙書省不能節賜予遷敘無法名器既濫財用益耗與始豐財之意刺謬矣明年武宗崩仁宗諒闇卽以變亂舊章流毒百姓誅脫虎脫籍沒其家初定中書員數也教化罷政事留京師教化雲南右丞愛魯子也俄加太尉太子太師平章軍國重事封魏國公尋爲南臺劾奪爵法魯忽丁亦罷政事均以不入尙書竟免於刑其後教化爲周王府常侍與陝西左丞相阿撒罕以周王舉兵入清君側爲陝西平章政事塔察兒所殺天祿二年詔竟還脫虎脫貲產

三寶奴亦失其仕履武宗卽位爲翰林學士承旨至大元年封渤海國公時方營居第御史臺言比詔罷不急之役今復爲諸官營私宅非宜有旨皆罷惟瓜頭及三寶奴所居勿罷其被寵眷如此俄加錄軍國重事遙授左丞相改封應國公二年平章尙書政事三寶奴卽建言尙書省當更新庶政變易鈔法用官六十四員有品秩未至者有未歷仕者宜勿拘例授以宣敕遂詔天下敢沮撓尙書政事者罪之俄進尙書左丞相加太保明年詔與脫虎脫總治百司是時皇子和世琜已長三寶奴欲擅定策功因勸帝廢皇太子而立皇子賴知樞密院康里脫脫言而止語在脫脫傳三寶奴言故相和禮霍孫時省部官日具一膳免其以飢退廢公事也今則無資乞各賜鈔二百錠規運取息爲食制可又言省部官不肯勤恪署事敕自今晨集暮歸怠者不必以聞便宜罪之其到官一

二月辭病者杖罷不敘俄賜號荅刺罕復改封楚國公三寶奴本巧佞善要權取賂又全效桑哥所爲欲以威橫脅制百官於是怨者眾矣然三寶奴亦時爲善言冀甯大同保定眞定以五臺建寺多取於民三寶奴爲奏免一年租稅又言養豹害民爲甚乞爲之禁其矯飾干譽皆此類也三寶奴任尙書未二載仁宗正其罪誅死家籍初三寶奴謫武昌往來故翟萬戶妻劉氏家及爲左丞相劉氏追逃婢入京師卽上謁三寶奴不答入其西廊見其逃婢所竊寶鞍錦帕在其榻以問三寶奴又不答乃詣御史臺訴三寶奴奪其所進亡宋玉璽金倚夜明珠詔尙書省臣及大宗正府也可札魯花赤中正使雜問以爲妄杖劉氏婦遣還人以是知三寶奴之行也三寶奴子二人曰上都曰哈刺八都兒爲文宗近侍天祿元年命還其所籍及制命至順元年以三寶奴謀立明宗爲忠追

封郢城王謚曰榮敏始尙書省之復也議本起脫虎脫樂實繼言鈔法大壞請更之令工畫新鈔式以進其時保八亦附之深以立尙書省爲便帝命與中書塔思不花乞台普濟康里脫脫赤因帖木兒其議保八言政事得失皆前日中書省臣所爲今欲舉正彼懼有累孰願行者臣請舊事從中書新事從尙書請以乞台普濟脫虎脫爲丞相三寶奴樂實平章政事臣爲右丞王巖參知政事江甲爲印庫大使卽進新鈔式者也帝大悅之命官次第並從其言惟益以忙哥鐵木兒爲左丞郝彬參知政事而已塔思不花言此大事當與老臣更議帝不從也樂實遂言江南平垂四十年民止輸地稅商稅他無與焉其富家蔽占王民奴使之者率百千家多至萬家乞令有司覈實凡收糧五萬石之家石輸二升於官仍質一子爲軍所輸之糧半入京師以養衛士半留其地以備凶年

富國安民之善術也詔卽行之樂實高麗人尙移相哥大王子埜先帖木兒女號峻台公主遂以爲駙馬都尉遙授左丞相仍行平章政事封齊國公王巖加大司徒是時皇太子深惡尙書所爲至大四年正月武宗崩省臣惟郝彬以稱疾不視事免於罪彬自有傳忙哥鐵木兒得末減杖流海南餘並誅死已而陝西平章政事孛羅帖木兒江浙平章政事烏馬兒甘肅平章政事闊里吉思河南參知政事荅失鐵木兒江浙參知政事萬僧皆以黨附挾勢害民黷貨無厭論罷三月仁宗卽位詔曰凡尙書誤國之臣皆已伏誅同惡亦已放殛百官庶物悉歸中書可大赦天下

鐵木迭兒憲宗時大將不憐吉帶之孫也史失其姓氏伯父忽魯不花世祖時爲右丞相父曰木火兒赤後贈其三世及忽魯不花皆歸德王各錫功臣謚號鐵木迭兒初嘗逮事世祖大德間同知

宣徽院事兼通政使有寵於興聖皇太后後出爲江西平章政事至大元年拜雲南左丞相居二載以擅離職赴闕爲尙書省所奏武宗方詰問而以皇太后旨宥罪還職明年武宗崩仁宗在東宮以尙書丞相脫虎脫三寶奴等姦黷誅之遂用完澤李孟平章中書政事銳欲更張庶務而皇太后已召鐵木迭兒爲中書右丞相踰月仁宗卽位因遂相之鐵木迭兒初猶未敢鴟張皇慶元年奏當黜左右司六部官不盡心者徐以疾去延祐元年阿散爲右丞相阿散以己回回人居大位必爲國人所疾又欲崇鐵木迭兒以媚皇太后也因言臣非世勲族姓幸逢陛下爲宰相如鐵木迭兒練達政體且當監修國史乞授之印俾領翰林國史院軍國重事悉令議之仁宗曰然卿其啓諸皇太后與之印大事必使與聞遂拜開府儀同三司監修國史錄軍國重事居數月復拜右丞相而

阿散改左丞相鐵木迭兒旣復居首相於是知威嚴之已立也乃上言內侍毋輒干預中書政務又請以江浙右丞曹立領諸番商賈事發舟十綱給牒以往歸則征税如制私往者沒其貨又經費不給臣等集諸老臣議皆謂動鈔本則鈔法愈虛加賦稅則毒流黎庶增課額則比國初已五十倍矣惟預賣山東河間運使來歲鹽引及各冶鐵貨庶可以足今歲之用又江南田糧多未覈實可始自江浙以及江東西宜先事嚴限格信罪賞令田主手實頃畝狀入官諸王駙馬學校寺觀亦令如之仍禁私匿民田貴戚勢家毋得沮撓請敕臺臣協力成之則國用足矣遂遣使者分往各省括田增稅苛急煩擾江右爲甚而贛甯亂作矣帝以南方騷動命罷其事明年鐵木迭兒言中書省臣當分領庶務請以錢帛鈔法刑名委李孟阿卜海牙趙世延糧儲選法造作驛傳委章閻蕭拜

住曹從革從之尋命總宣政院使進位太師太宗正府奏舊制凡議重刑必決於蒙古大臣今宜聽於太師右丞相帝又從之鐵木迭兒既威權日盛遂怙勢貪橫兇穢彰於天下是時蕭拜住進拜平章政事稍牽制之而楊朵兒只方拜御史中丞慨然以糾姦臣爲己任上都富人張弼殺人繫獄鐵木迭兒受弼賂有顯徵朵兒只乃與拜住及上都留守賀勝奏之內外御史四十餘人共劾鐵木迭兒桀黠貪陰賊險很蒙上罔下蠹政害民布置爪牙威讐朝野凡可以誣陷善人要功利己者靡所不至取晉王田千餘畝與教寺後孀土地三十畝衛兵牧地二十餘畝竊食郊廟供祀馬受諸王哈兒班荅使人鈔十四萬貫寶珠玉帶襪毳幣帛又計鈔十餘萬貫受杭州永興寺僧賂金百五十兩取殺人囚張弼鈔五萬貫且已領宣政院而以子八里吉思爲使諸子盡居顯要家奴

縱虐官府爲害百端以致陰陽不和山移地震災異數見百姓流亡已乃略無省悔私家之富在阿合馬桑哥之上四海疾怨咸願車裂以快其心如蒙早加顯戮庶使後之爲臣者知所警戒帝閱奏大怒命逮問鐵木迭兒匿與聖近侍家有司不得捕仁宗不樂者數日乃僅罷相而已然未逾年又起爲太子太師中外驚駭御史中丞趙世延率諸御史論列其罪又論其不可輔導東宮四十餘人惟以皇太后故終不能明正其罪也明年仁宗崩越四日皇太后命復爲右丞相於是鐵木迭兒三入中書以英宗方弱冠益輕之遂以皇太后旨召蕭拜住楊朵兒只至徽政院與徽政院使失列門御史大夫脫脫哈雜問之遂稱旨執二人棄市英宗卽位百官稱賀鐵木迭兒爲班首卽奏委平章政事王毅右丞高昉徵理在京倉庫責所虧於各官吏立程嚴督又乘英宗在上都以前

元書 卷九十六
嫌殺留守賀勝趙世延自四川逮至都必欲置之極刑是時鐵木迭兒恃其權寵乘間肆毒眦睚必報英宗覺其所譖毀者皆先帝舊人滋不悅其所爲乃任拜住爲左丞相委以心腹鐵木迭兒漸見疏外竟以壽終於家脫脫哈御史大夫玉昔帖木兒子也亦曰秃秃哈亦曰脫忒哈少入宿衛累官御史中丞延祐六年進大夫仁宗諭之曰御史大夫責任至重以卿勳舊之裔故特用卿當思乃祖乃父忠勤王室也俄襲廣平王賜之印天子以世臣甚倚任之然脫脫哈實秉性姦回黨於鐵木迭兒初皇太后威福已出內則買驢母亦列失入用事要束木之妻也外則幸臣失列門紐鄰及鐵木迭兒咸怙寵肆威蕭拜住楊朵兒只之殺實脫脫哈與失列門構成其罪天下莫不切齒英宗卽位鐵木迭兒旣疏刑政頗肅又心悉脫脫哈等之姦脫脫哈懼而阿散亦以丞相出平章嶺

北政事遂與失列門及平章政事黑驢及亦列失入謀廢立事覺英宗御穆清閣召平章政事拜住謀之對曰此輩擅權亂政久矣今猶不懲乃陰結黨羽謀危社稷宜速施天威以正祖宗法度因請鞫狀帝恐少緩姦黨將借太后以爲辭也乃命拜住率衛士亟禽之皆伏誅籍其家以故奪人畜產歸其主鐵木迭兒旣死御史蓋繼元宋翼言其上負國恩下失民望生逃顯戮死有餘辜乃命毀所立碑追奪其官爵及封贈制書亦籍沒其家鐵木迭兒攘奪苛虐大畧比阿合馬桑哥而狠毒尤甚羣兇蔓引翦不能盡英宗遂被弑鐵木迭兒子鎖南嘗爲治書侍御史以大逆誅死鎖南兄班丹知樞密院事先以贓敗不敘弟八里吉思爲宣徽院使鎖住將作院使天祿時燕帖木兒言軍興與有勞績竟還所籍焉至順元年鎖住及其弟觀音奴姊夫阿里牙皆坐怨望呪詛伏誅

伯顏太師馬札兒台兒也家世在馬札兒台傳伯顏年十五卽侍武宗於藩邸從北征海都累戰爲諸將先賜號拔都兒武宗卽位累遷御史中丞至大二年加平章尙書政事特賜蛟龍虎符領右衛阿速親軍都指揮使司達魯花赤加特進延祐元年仁宗命爲周王常侍數年歷南臺中丞大夫江浙平章政事又歷西南臺大夫泰定中復歷江西河南平章政事伯顏以舊所賜河南田五千頃過豐乃以二千頃奉帝師祝釐以八百頃助給宿衛姦豪毒民必深治之會帝以致和元年崩燕鐵木兒貪援立功遣明里董阿迎懷王於江陵道河南燕鐵木兒夙與伯顏同事武宗意氣相得因使以密謀告伯顏約相表裏伯顏慨然許諾卽集僚屬會計倉廩府庫之數乘輿供御牢餼膳羞徒旅委積士馬芻糧供億之須以及賞賚犒勞之用檄州縣募民折輸明年田租貸商人貨貲約

倍息以償又邀東南常賦之經河南者輒止之徵發民丁增置驛馬補城櫓浚濠池修戰守具嚴徵邏斥候遂南報懷王北報燕鐵木兒言河南事當自效又別募兵五千人以迎懷王而躬勒兵以俟其時河南惟參知政事脫別台不從欲手刃伯顏伯顏拔劍殺之懷王拜伯顏河南左丞相比自江陵至伯顏率僚屬迎伏道旁稱萬歲卽上前勸進懷王解金鎧御服寶刀及海東白鶻文豹賜伯顏明日扈從北行文宗卽位伯顏仍領宿衛加太尉開府儀同三司錄軍國重事御史大夫中政使天祿二年拜太保其秋拜左丞相尋改知樞密院事至順元年文宗以伯顏功大不有異數不足以償之乃特命尙甯王闊闊出女孫卜顏的斤公主分賜虎士三百怯薛歹百蔑里乞軍百阿速軍百隸左右宿衛又賜黃金雙龍符鐫文曰廣忠宣義正節振武佐運功臣組以寶帶世爲明券

元書 卷九十六
凡宴飲視諸宗王禮明年封浚甯王追王三世又加昭功宣毅萬戶忠翊侍衛都指揮使文宗寵待伯顏稍亞燕鐵木兒然視諸大僚則曩絕矣三年加太傅兼徽政使又爲建生祠樹碑於汴梁順帝之自靜江還也久未立而燕鐵木兒死始卽位於是以伯顏爲右丞相加太師上柱國監修國史進封秦王元統二年知經筵事爲奎文閣大學士兼領諸院使盡總諸衛親軍都指揮使明年燕帖木兒子唐其勢及其弟塔刺海惡伯顏出己上遂謀變伯顏誅之餘黨北奔伯顏又親帥師往上都擊破其眾遂鳩殺皇后伯牙吾氏以其匿唐其勢兄弟於後宮也詔賜伯顏號蒼刺罕俾世襲之至元元年伯顏言宜遵舊章寢妨農之政停海內營造四年息彰路萊蕪冶鐵一年蠲京畿漕戶雜徭減河閒兩淮福建鹽額歲十有八萬五千有奇振沙漠貧戶及南北飢民至千萬計帝皆從

之其知經筵必導講官盡心啓沃太皇太后賜第時雍坊詔雄麗視諸王邸伯顏力辭務從損約四年求解政柄三宮交勉留五年詔爲大丞相加號元德上輔賜七寶玉書龍虎金符伯顏初本欲博名譽然自誅唐其勢後專權自恣羣小依附變亂祖宗成憲漸有姦謀不復守臣節帝始患之伯顏亦欲以其弟子脫脫伺帝起居又懼物議乃以樞密知院汪家奴翰林承旨沙刺班同侍禁近實屬意脫脫故脫脫政令日修而衛士拱聽約束伯顏自領諸衛精兵以燕者不花爲屏蔽導從之盛填塞街衢而帝出則儀衛遠不逮也脫脫知伯顏不可諫乃乘閒自結於帝帝始未之信是時帝前後左右皆伯顏所置私人獨世傑班阿魯爲帝腹心遂遣二人與脫脫爲友又以潛邸舊人錢塘楊瑀參焉車駕自上都還伯顏歸在後脫脫等謀益固會伯顏構陷郟王徹徹禿帝未允其奏

元書 卷九十六
輒傳旨賜死復奏貶宣讓王帖木兒不花威順王寬徹不花辭色憤厲不待旨而行帝益忿之因與脫脫語泣下脫脫欲候伯顏入朝禽之戒衛士嚴宮門出入螭坳亦爲置兵伯顏見之大驚遂心疑脫脫六年伯顏盛陳兵衛請帝出田帝託疾不往伯顏遂請燕帖古思太子同獵出次柳林脫脫遂悉拘門鑰與世傑班等奉帝御玉德殿召省院大臣午門聽命夜二鼓遣月可察兒率三十人抵太子營取之入城又召楊瑀入草詔數伯顏罪狀四鼓命平章政事只兒瓦台齋至柳林宣詔出伯顏爲河南左丞相明日伯顏遣人至城下問故脫脫城上立宣言有旨黜丞相一人諸從官可各還本衛於是諸衛士皆散伯顏奏乞陛辭不許遂行道出眞定父老奉觴酒以進伯顏問曰汝曾見子殺父事乎父老曰不曾見子殺父惟見臣弑君伯顏俛首有慚色詔復徙南恩州陽春縣安

置行至江西龍興路驛舍病死

哈麻字士廉康里人也父曰禿魯以妻爲甯宗乳母故封冀國公加太尉哈麻緣是與弟雪雪早備宿衛事順帝有寵而哈麻有口才尤爲帝所褻幸累官殿中侍御史雪雪累官集賢學士帝每卽內殿與哈麻雙陸一日哈麻服新衣侍側帝喫茶於其衣哈麻視帝曰天子固當如此耶帝一笑而已其被愛幸無與爲比由是權傾一時自藩王戚里皆遺賂之然是時帝惡伯顏倚脫脫制之哈麻以欲謀害脫脫故貶南安尋召入爲禮部尙書遷同知樞密院事至正初脫脫爲丞相其弟也先帖木兒爲御史大夫於是哈麻懼其盛改而趨附其門會脫脫去位而別兒怯不花爲丞相與脫脫有舊怨屢欲中傷之哈麻每竭力營護得免及別兒怯不花罷太平爲左丞相頗惡哈麻欲去之御史大夫韓嘉納亦欲去哈麻

元書 卷九十六
監察御史幹卽海壽遂劾哈麻受宣讓王等駝馬又設帳房御幄後尤無人臣禮又言哈麻出入脫忽思皇后宮闈脫忽思皇后帝庶母也哈麻自知見鄙於士論然忿太平韓嘉納欲敗其謀乃先入見帝反構太平韓嘉納等以罪皆被黜罷或貶死事具韓嘉納傳哈麻雖亦罷居草地未幾卽召復用於時脫脫復爲右丞相甚德哈麻之爲己地也十二年拜哈麻添設右丞明年卽眞然脫脫方信任參議汝中柏而哈麻恃寵輒與齟齬汝中柏因短哈麻於脫脫於是改哈麻官宣政院使又位居第三哈麻由是深嫌脫脫釁隙遂成矣初哈麻嘗陰薦西天僧以運氣術媚帝禿魯帖木兒者哈麻妹婿也亦故有寵於帝與老的沙八郎等十人俱號倚納赤禿魯帖木兒尤姦狡帝言聽計從亦薦西蕃僧伽璘眞於帝君臣宣淫而羣僧出入禁中無所防閑醜聲穢行漸著於外雖市井

之人亦惡聞之皇太子年日以長尤深疾焉欲謀去其黨未能也會脫脫督軍討高郵哈麻乘閒復中書平章政事脫脫之出師也以汝中柏爲治書侍御史輔也先帖木兒操政本汝中柏累言哈麻必當屏斥勿貽後患也先帖木兒不能從哈麻聞甚恐遂譖於皇后奇氏曰皇太子旣立而冊寶未授者脫脫兄弟之意也皇后頗信之哈麻復與宣徽使汪家奴子桑哥失里譖諸皇太子也先帖木兒方移疾家居御史卽承望風旨言脫脫老師費財也先帖木兒庸才鄙器玷汙清臺章三上帝遂以汪家奴爲御史大夫脫脫也先帖木兒皆就貶逐雪雪是時已累遷知樞密院事與太不花月赤察兒同爲總兵官代脫脫將十五年雪雪拜御史大夫哈麻遂拜左丞相國家大柄盡歸二人矣其歲哈麻竟矯詔賜脫脫鳩死於鎮西明年哈麻自以旣爲相恥前進西僧爲士大夫所笑

因告其父秃魯言秃魯帖木兒專以淫褻媚上上日益昏昧而皇太子聰明當立之爲帝而以帝爲太上皇其妹聞之因歸以告秃魯帖木兒以哈麻並將圖己乃洩其謀於帝帝大驚哈麻兄弟遂俱落職尋御史大夫搠思監復陳其惡帝曰哈麻兄弟侍朕日久又與朕弟懿璘質班皇帝同乳姑緩其罰令出征自效數日右丞相定住平章政事桑哥失里復劾不已遂貶哈麻惠州安置雪雪肇州安置比行俱杖死哈麻死仍籍其家而受賜所籍也先帖木兒之貲封識固未嘗啟也哈麻陰恨所譖害人士甚多其死距脫脫遇鳩才數十日天下快之秃魯帖木兒本皇太子所深憾後帝遣秃魯帖木兒教皇太子以密秘佛法皇太子乃大喜由是無復曩時惡倚納赤之意矣二十四年孛羅帖木兒兵入京師秃魯帖木兒以狎臣與波迪哇兒禡等並爲所殺死

搠思監湖廣左丞相亦憐真之子也家世見其叔父秃魯傳搠思監自秦定初襲長宿衛爲必闡赤至順時除內八府宰相後至元二年拜江浙參知政事海漕米三百萬石達京師無耗折以是稱爲能六年擢湖北道肅政廉訪使遷江浙右丞數年歷中政使御史中丞翰林學士承旨宣徽使久之累歷官臺省以平章政事從丞相脫脫南平徐州有功至正十五年出平章陝西政事尋召知樞密院事復平章政事兼大司農分司提調大都留守司及屯田事十六年復遷御史大夫遂爲左丞相明年轉右丞相十八年加大保詔贈其三世王爵搠思監始本以寬厚名歷行省諸司亦有政迹然自居上輔聲日損寢嗜賄賂御史燕只不花遂奏搠思監私人朵列及妾弟崔完者帖木兒印造僞鈔事將敗乃令朵列自殺以滅口搠思監懼遂請罷詔止收其綬印而御史荅里麻失

里王彝言不已左丞相太平欲全大臣體頗爲之緩頰帝遂不聽御史言朴不花者高麗人始帝二皇后奇氏微時與同鄉里相爲依倚及爲皇后子爲皇太子朴不花闖入宮事后累官至資政院使與后要譽干權頗出私財醫病卹喪收瘞死者帝爲命翰林院製文名之曰善惠之碑朴不花遂倚勢日益肆皇太子之謀內禪也朴不花實承皇后意以諭太平太平不荅二十年太平遂去相位而搠思監復爲右丞相搠思監見朴不花有盛寵奧援遂與朴不花比當是時大將察罕帖木兒與孛羅帖木兒方勇爲私鬪朝廷令皆罷兵而搠思監朴不花黷貨無厭視孛羅帖木兒賂厚則曰密旨令汝併彼若察罕帖木兒有賂則稱密旨亦然由是遂構兵不解已而察罕帖木兒薨子擴廓帖木兒襲領其眾隙益深天下亦大亂搠思監知帝事少決益橫狡惟知有二皇后皇太子不

知有帝也二十三年以太平違皇太子意遂譖太平而逼殺之天下爲之憤怒尋以朴不花爲臺官也先不花陳仁祖等所劾皇后皇太子庇之甚固仁祖再上書皇太子遂同御史大夫老的沙以下皆辭職事具仁祖傳會侍御史李國鳳亦上書言朴不花駸駸有趙高張讓田令孜之風皇后皇太子以老的沙執其事甚力深惡之帝爲之盡出臺官老的沙者帝舅也已封爲雍王命之國然知皇太子必欲害之遂奔大同依孛羅帖木兒帝無如皇后太子何乃密詔孛羅帖木兒留之軍中隱其迹而搠思監朴不花以未嫌太子意乃圖形求之並欲興大獄陷十八功臣後帝知其無辜特命大赦而搠思監增入赦條內言獨不赦老的沙一獄由是太平子也先忽都亦罹其中竟以枉死明年搠思監以孛羅帖木兒敢匿老的沙欲削其兵權時皇太子方倚重擴廓帖木兒欲以其

元書 卷九十六
兵力討李羅帖木兒。搠思監乃召承旨張翥，草詔宣李羅帖木兒悖逆之罪，奪其官，翥以未見帝辭，乃召參知政事危素，就丞相客坐草之。搠思監語其屬郎中曰：「我爲朝廷出此詔，撥亂反正之舉也。」郎中曰：「相公得無撥正反亂乎？」詔下，李羅帖木兒果以非出帝意，遂不奉詔。而遣將會禿堅帖木兒舉兵向闕，禿堅帖木兒亦皇太子所惡者也。尋宗王不顏帖木兒亦稱兵與李羅帖木兒合表，言其誣枉。於是帝乃下詔數搠思監、朴不花、黃緣爲姦，互相壅蔽，簧惑主聽，諸罪屏搠思監於嶺北，竄朴不花於甘肅，以快眾憤。而復李羅帖木兒官爵，李羅帖木兒以二人實未嘗出都門，遂以兵入居庸，聲言清君側，意在必得搠思監、朴不花。乃已，帝不得已，縛二人昇之，二人皆囚首以見。李羅帖木兒、李羅帖木兒爲之加帽，易衣禮之。三日始問以濁亂天下之罪，復笑問搠思監曰：「我前賂

公七寶珠安在，索得之，乃怒曰：「天子之宰貪婪，如是我可以姑容乎？遂并朴不花殺之已，而御史復言搠思監矯殺丞相太平，盜用鈔板私家草詔，鬻獄賣官，費耗庫藏，居廟堂十數年，使天下淪陷八省，其誤國之姦實大赦所難原也。曩者姦臣阿合馬之死，剖棺戮尸，今搠思監罪尤甚於阿合馬，竊謂雖死必剖棺戮尸爲宜。」詔從之，并沒其家，竄其子宣徽使觀音奴於遠方。先是有李邦甯者，以宋故小黃門從故主，羸入見，遂給事內廷，令學國書及諸番語，無不通解，授御帶庫提點，遷章佩少監，禮部尙書，歷事數朝。成宗以爲昭文館大學士，太醫院使，武宗命平章江浙邦甯辭，帝善之，加大司徒尙服院使，遙授丞相，行大司農，領太醫院事。言於武宗，宜親享太廟，語在郊祀志。遂授大禮使，加恩三代。仁宗遣釋奠國學，方就位，大風起，殿上及兩廡燭皆息，邦甯悚伏地良久，乃已。初

仁宗爲皇太子邦甯亦附丞相三寶奴欲擁戴周王武宗不悅及
仁宗立左右請誅之帝不從加儀同三司集賢大學士竟以壽終
論曰自古人主無不樂得賢臣而去奸回然而輒相反者利欲中
於人心故也異哉世祖仁明之君而嗜利無厭聚斂疊進天下騷
動矣况乎其繼世昏惑者乎至於事連宮闈與爲表裏則履霜堅
冰至矣元雖無寺宦之禍而近侍起跡猶寺宦也故忙哥撒兒伯
顏遂挾震主之威至於李邦甯欲居定策之功朴不花預謀內禪
移易天位然則非誼辟而能自立者幾何故曰朝廷正則王化成
未之有易也

尹策園 刊

劉世昌 刊

門人曾廣紳襄校

門人曾士琮詳校

元書卷九十六

元書卷九十七

邵陽曾廉譔

亂臣列傳第七十二

孟子曰孔子作春秋而亂臣賊子懼然則春秋之未作亂臣賊子且喜且幸可知已矣何則孔子與季氏言冉有季路弑父與君亦不從也以聖門高弟豈須致慮如此而子又曰鄙夫可與事君也與哉其未得之也患得之既得之患失之苟患失之無所不至矣無所不至云者即謂其可以至於弑父與君也是故致天下之亂莫如鄙夫鄙夫庸庸惟貪名位雖天才固爾亦會其時惡直貴諛而然也嗚呼亦惡知惡直貴諛遂至於弑逆哉易曰非一朝一夕之故其所由來者漸矣履霜冰至蓋言順也順則不知其然而然苟或可為也華歆亦可為也揆其初衷蓋有雲霄淵泉於此者矣

此孔子所以稱冉有季路爲不從而從之者其必眾矣然春秋於魯不書弑曰爲內諱也記明堂位之美魯也亦曰君臣未嘗相弑也是亦爲內諱也諱則亂臣賊子何以儆焉曰春秋於魯不書弑而於隱公書薨而已不言其薨於路寢則知其非考終也繼弑君不言卽位桓公書卽位則知其主弑也閔公但書薨亦足知其非考終也而僖公不書卽位則知其不與弑也此聖人名諱而實不諱亂臣賊子欲益而彌章而國必有君但義能討賊亦聖人之所與也吾怪夫元人之議右憲宗而左失烈門猶以爲未成君也泰定帝以爲與弑而坐倒刺沙以逆謀文宗以爲定難而名阿禮海牙爲忠義然則僖公季友爲篡弑之賊而桓公輩宣公遂爲忠孝之舉也豈不悖哉孔子深許有路蓋豫知天下必有歆或其人者矣易曰天地定位聖人成能元黃剖判如彼黑白傾倒如此此亂

臣賊子所宜喜幸而援引於弗絕也余乃入燕鐵木兒於亂臣傳以繼麟經之志而後君臣之位定君臣之位定然後邪說不敢肆而春秋之義行矣

鐵失不知其族籍太師鐵木迭兒義子也英宗初爲翰林學士承旨宣徽院使又兼太醫院使尋又領中都威衛指揮使至治元年賜以珍珠燕服拜御史大夫兼忠翊侍衛親軍都指揮使仍太醫院使帝嘗御盃頂殿謂鐵失曰徽政雖隸太皇太后朕視之與諸司同凡簿書宜悉令御史檢覈既又命領左右阿速衛冬十月帝親祀太廟以左丞相拜住爲亞獻官鐵失爲三獻官鐵失爲人本陰賊又恃帝寵二年帝徵南臺御史大夫脫脫爲中臺大夫鐵失欲專臺政忌之脫脫因請疾卽還鐵失劾其未奉旨輒去杖而謫之雲南治書侍御史鎖南鐵木迭兒之子也罷爲翰林侍講學士

鐵失奏復其職賴帝不允而止是時鐵木迭兒已死其黨合散黑
驢等雖已誅極然也先鐵木兒等素依鐵木迭兒貪穢無忌甚不
利帝之任拜住而欲結鐵失以自固帝亦未能退鐵失十二月更
命依前官兼領廣惠司英宗嘗謂臺臣曰朕深居九重臣下姦貪
民生疾苦豈能周知故用卿等爲耳目曩者鐵木迭兒貪蠹無厭
汝等拱默不言今其人雖死宜籍其家以懲後也三年二月申命
鐵失振舉臺綱詔諭中外旣而臺官請降旨開言路英宗曰言路
何嘗不開但卿等選人未當耳朕知嚮所劾者率因宿怨羅織成
獄加之以罪遂玷其人終身不得伸監察御史嘗舉八兒思吉思
可任大事遽以墨誅然則選人可謂當乎鐵失以鐵木迭兒腹心
見帝窮治鐵木迭兒家內惴惴不自安又帝責臺事甚備而拜住
爲右丞相性剛正恐不能相容遂萌異志矣

也先鐵木兒太師淇陽王月赤察兒子也月赤察兒在其曾祖博
爾忽傳也先鐵木兒兄塔刺海輔武宗爲右丞相而次兄瓜頭襲
淇陽王仍爲太師也先鐵木兒襲瓜頭淇陽王累官知樞密院事
也先鐵木兒以四怯薛家常領宿衛以黨於鐵木迭兒與右丞相
拜住相失遂與鐵失共謀弑帝而立晉王會英宗自上都還京師
駐蹕南坡是夕鐵失也先鐵木兒與大司農荅失兒前平章政事
赤因鐵木兒前雲南平章政事完者前治書侍御史鎖南宣徽使
鐵失弟鎖南典瑞使脫火赤樞密院副使阿薩僉書樞密院章台
衛士禿滿及諸王按梯不花孛羅月魯帖木兒曲呂不花兀魯思
不花等以鐵失所領阿速衛兵爲外應鎖南毅弓露刃斫丞相拜
住臂以死而鐵失直犯禁幄手弑英宗於臥榻於是諸王按梯不
花淇陽王也先鐵木兒遂奉皇帝璽綬以迎晉王於鎮泰定帝旣

元書 卷九十一
卽位乃誅鐵失於行在誅也先鐵木兒於大都諸逆黨皆駢誅而盡竄附逆諸王於邊事已具泰定紀明年以誅逆臣也先鐵木兒等詔天下也先鐵木兒竟名首惡焉初鐵失與鐵木迭兒等以鬻浙田僧寺爲贓巨萬拜住覈實之法當誅特以赦免姦黨又陰啟西僧求大赦拜住不可然外人皆知御史大夫與丞相意相忤欲圖傾害而拜住又欲曲全大臣體姑少容焉故及於難

燕鐵木兒知樞密院事句容郡王牀兀兒之子也牀兀兒在其祖班都察傳燕鐵木兒蚤從武宗於朔方軍中特見愛幸及卽位除同知宣徽院事襲其父左衛親軍都指揮使泰定帝立累遷同僉樞密院事致和元年遷本院僉書燕鐵木兒將家子猛鷲多權譎窺帝信近習賢桀未附陰欲有所奉旣得管樞鑰會其歲七月帝崩於上都皇太子幼弱未卽位燕鐵木兒遂謀變以八月甲午昧

爽入興聖宮劫執平章政事兀伯都刺等十人卽遣使迎懷王於江陵推別不花等五人入典省院而以兵守關隘拒皇太子於上都事已具文宗本紀旣而懷王入燕而國人已立皇太子爲皇帝改元天順遂命梁王王禪等聲罪致討九月燕鐵木兒犯王師於榆林乘其未陣薄而敗之又以兵敗遼東平章政事禿滿迭兒兵於流沙河因率其黨詣懷王勸進懷王以兄周王在朔方辭燕鐵木兒進曰人心向背之機聞不容髮一或失之噬臍無及矣於是懷王遂卽位後爲文宗越日遂封燕鐵木兒爲太平王以太平路爲其食邑加開府儀同三司上柱國錄軍國重事右丞相監修國史知樞密院事賜黃金鈔及金素織段色縉海東白青鶻豹兼平江官地五百頃燕鐵木兒已帥師迎擊禿滿迭兒於薊州聞梁王軍破居庸關則蓐食倍道而還遇梁王前軍於榆河敗之王師

據紅橋而陣燕鐵木兒射卻之又連敗之於白浮又追敗之於昌平而王師又已克古北口燕鐵木兒遂移師追擊禽駙馬孛羅帖木兒平章政事蒙古塔失雅失帖木兒撒兒討溫於牛欄山十月又移師破營王也先鐵木兒及禿滿迭兒兵於通州敗陽翟王太平國王台羅兵於檀子山陽翟王爲所殺又移師逐出諸王忽刺台兵於蘆郊橋於是文宗大悅賜燕鐵木兒黃金印及玉盤龍衣珠衣寶珠金帶然王師猶銳復破古北口燕鐵木兒復進敗王師於檀州獲朵羅台塔海等盡殺之會齊王月魯帖木兒以兵襲上都天子見弑於是天下寢歸文宗矣文宗以兩都平賜賚燕鐵木兒尤厚加世號荅刺罕特置大都督府令領之尋以燕鐵木兒未入臺特命爲御史大夫未幾復爲右丞相領職事如故初燕鐵木兒之構變也本曰奉周王懷王亦使人馳自北來言周王且至以

忱眾至是上都既亾文宗乃遣使迎周王於漠北立爲皇帝是爲明宗文宗因解皇帝璽綬使燕鐵木兒上之明宗仍命燕鐵木兒爲右丞相太平王兼舊勳階加拜太師然燕鐵木兒意實在文宗會上璽綬時明宗從官有不爲之禮者燕鐵木兒大恚懼明宗雖以文宗爲皇太子燕鐵木兒不悅也文宗亦不樂居儲位於是燕鐵木兒與明里董阿月魯不花也里牙以從皇太子迎見皇帝於察忽旺都行殿因宴進毒於帝以暴崩聞燕鐵木兒卽入帳中取寶璽扶皇太子上馬南還皇太子遂復卽位由是益寵眷燕鐵木兒追封曾祖班都察溧陽王祖土土哈昇王父牀兀兒揚王明年詔爲立石北郊至順元年文宗以爲寵數雖屢頒不足以報大勳乃命獨爲丞相以示尊異其歲知樞密院事闊徹伯脫脫木兒通政使只兒哈郎翰林學士承旨教化的伯顏也不干燕王宮相教

化的幹羅思中政使尙家奴禿烏台右阿衛指揮使那海察拜住皆明宗舊臣也忿燕鐵木兒之逆因相結欲復仇事覺皆爲燕鐵木兒所害燕鐵木兒亦以太醫院使也里牙坐怨望詎咒罪死文宗命崇文監以燕鐵木兒家世刊板行之二年詔爲建第興聖宮南尋又爲立生祠於紅橋文宗如上都親臨視焉又市故平章政事阿魯渾撒里宅居皇子燕帖古思命燕鐵木兒育之而養其子塔刺海爲子尋又命兼奎章閣大學士領其院事復賜龍慶州流杯園池水磴土田平江松江江陰蘆場蕩山沙塗沙田等地燕鐵木兒以西域人敢行大事文宗禮待之居國人之右其寵賜開國功臣不逮也四年文宗崩遺詔曰立明宗子燕鐵木兒以昔與弒明宗聞之大懼因固請皇后立燕帖古思皇后不從乃立甯宗又復召順帝於靜江皆非燕鐵木兒意也燕鐵木兒權勢傾一時驕

肆無忌嘗取泰定帝后爲夫人尙宗室女四十人有交禮三日遣還者後房充斥不能盡識順帝至不得立亦莫敢如何然至是心日以瞽亂益極意荒淫溺血死於是順帝始卽位伯顏代爲右丞相然帝猶以其弟撒敦爲左丞相其子唐其勢爲御史大夫並襲太平王二人皆從燕鐵木兒力拒王師者也又命唐其勢總管高麗女直漢軍萬戶府達魯花赤撒敦以左丞相加開府儀同三司上柱國錄軍國重事達爾罕榮王太傅賜廬州爲食邑宥子孫九死贈燕鐵木兒公忠開濟宏謨同德協運佐命功臣德王諡忠武官勳如故至元元年立燕鐵木兒女爲皇后時撒敦已薨其弟蒼里襲父句容郡王懷怨望而唐其勢爲左丞相忿伯顏用事曰天下本我家天下也伯顏何人敢居吾上遂與蒼里謀廢帝而立并王晃火帖木兒因伏兵東郊而與弟塔刺海以勇士突入宮闕伯

元書 卷九十七 六
顏掩捕獲之遂竝伏誅苔里亦以發兵殺使者見戮伯顏遂竝酖
后事在后妃傳至元六年順帝撤文宗廟主詔曰文宗與月魯不
花也里牙明里董阿共謀不軌使我皇考飲恨上賓內懷愧慊則
殺也里牙以滅口時月魯不花已學佛吐蕃死乃執明里董阿誅
之其時燕鐵木兒族已赤矣然詔漏其名幸也明宗諸臣又有哈
八兒秃明宗卽位所首用爲平章政事者也文宗將復位先出哈
八兒秃平章嶺北政事闊徹伯等之死御史王文若乃言哈八兒
秃俚鄙宜罷制曰可爾時臺臣承望風旨如此燕鐵木兒所殺十
二人脫脫木兒附見阿禮海牙傳然亦不能舉其家世也惟尙家
奴後贈太師東平王諡貞獻只兒合郎後贈太傅威甯王諡襄愍
餘皆未有聞焉其九人則竝軼事亦不可攷也故皆弗爲傳而備
記於此云

李羅帖木兒父荅失八都魯自有傳李羅帖木兒從父征戰積功
官至四川左丞荅失八都魯薨於石村李羅帖木兒引兵退駐井
陘就命李羅帖木兒爲河南平章政事領其父兵李羅帖木兒擊
走劉福通於衛輝進克濮州駐兵眞定既又克曹州朝廷乃命移
鎮大同蔽京師置大都督兵農司分十道專督屯田以李羅帖木
兒領之李羅帖木兒復擊敗關先生兵於豐州雲內破楊誠於蔚
州拜中書平章政事申命爲總兵領一應蒙漢諸軍便宜行事當
是時盜賊縱橫諸將握重兵尤多驕蹇李羅帖木兒與察罕帖木
兒爭冀甯有隙朝廷不別曲直命以冀甯畀李羅帖木兒察罕帖
木兒以冀甯已所平定拒命不與朝廷再遣使諭解二人始各還
鎮乃命李羅帖木兒屯田於保定以東河間以南尋加拜太尉而
中書右丞也先不花總督屯田與知樞密院事秃堅帖木兒分院

地近因擾及其親里亦成嫌隙也先不花乃譖秃堅帖木兒有異志孛羅帖木兒與秃堅帖木兒善且知其誣乃遣人白其無罪會御史大夫老的沙以主持御史劾宦者朴不花罪狀忤皇太子意欲殺之帝以老的沙其母舅也因遣宦官密諭孛羅帖木兒匿之軍中皇太子往索之孛羅帖木兒以帝密詔故不遣孛羅帖木兒本暴戾無人理陰使人殺其叔父右丞亦只兒不花陽不知也往奔喪不哭皇太子遂并以罪孛羅帖木兒欲藉擴廓帖木兒爲援而討之擴廓帖木兒以自父察罕帖木兒來與有深讎亦欲藉此相圖而是時丞相搠思監實與朴不花表裏爲姦利遂徇皇太子意下詔罷孛羅帖木兒兵權四川安置孛羅帖木兒知非出帝意遂不受詔而遣將會秃堅帖木兒犯闕帝爲執搠思監朴不花與之事已具權倖傳於是秃堅帖木兒乃入見帝於延春閣慟哭請

罪帝賜宴慰勉爲詔赦之復以孛羅帖木兒平章中書政事兼知樞密院事加拜太保仍守大同皇太子恚怒不已乃徵擴廓帖木兒兵保障京師詔并總諸道兵分攻大同孛羅帖木兒遂留兵守大同而帥師與秃堅帖木兒老的沙等復犯闕京師震駭皇太子親統兵迎於清河詹事不蘭奚敗走皇太子亦馳入城擴廓帖木兒所遣護京師者白瑣住遂夜脅東宮官僚從皇太子出奔太原孛羅帖木兒師至駐健德門外欲追襲之老的沙力止之乃已三人入見宣文閣泣拜訴冤帝亦爲之泣乃賜宴卽拜孛羅帖木兒爲左丞相老的沙平章政事秃堅帖木兒爲御史大夫尋加孛羅帖木兒開府儀同三司上柱國錄軍國重事右丞相節制天下兵馬數月閒誅狎臣秃魯帖木兒波迪哇兒禡等罷三宮不急修造汰宦官省錢糧禁西蕃僧作佛事數遣使迎皇太子還朝使至太

原輒拘留之並以除內難爲名承制調嶺北甘肅遼陽陝西及擴廓帖木兒兵進討孛羅帖木兒怒遂幽二皇后於諸色總管府逼取印章僞爲后書以召皇太子遣禿堅帖木兒攻上都之附皇太子者而調也速軍南禦擴廓帖木兒也速至良鄉不進乃揚言曰孛羅帖木兒舉兵向闕脅帝幽后此大逆也卽北歸永平遣人西連太原北連遼陽軍聲大振孛羅帖木兒患之遣驍將姚伯顏不花出拒至通州河溢營紅橋以待也速出其不意襲殺之孛羅帖木兒乃大恐自將出通州三日大雨而還孛羅帖木兒先以疑殺其將保安旣又失伯顏不花銳氣沮矣二皇后以數進美女於孛羅帖木兒又迫后取公主始得還宮遂與老的沙等恣爲淫虐一日并索及帝所愛幸美姬帝曰亦欺我至此乎時威順王子和尚心大忿之數言於帝帝密詔除之徐士本者家居好奇計不求仕

進和尚奏以爲翰林待制與之謀結壯士金諾海伯達兒帖古思不花洪寶寶等六人同立延春門東排仗內其日孛羅帖木兒早朝畢將出六人卒莫發會禿堅帖木兒告上都之捷平章政事失列門邀之入至延春門李樹下伯達兒躍出刃中其腦金諾海等攢殺之老的沙傷額趨出時帝居窟室約曰事捷則放鴿鈴至是鴿鈴起帝遽出窟室命盡誅其部黨黎安道方脫脫等皆伏誅老的沙擁孛羅帖木兒母妻子偕禿堅帖木兒北遁明日遣使函孛羅帖木兒首往太原詔皇太子還諸道兵皆罷賞討逆功徐士本不受賞一夕遁去其後獲老的沙禿堅帖木兒悉誅之

論曰鐵失也先鐵木兒其亦天性梟獍者耶亦怙厥凶威積漸以然也也先鐵木兒父日月赤察兒世家勳貴史文何賢其父而遺其子之凶不附禹山於博陸傳哉燕鐵木兒旣叛天順復戕明宗

元書卷九十七
視字羅帖木兒興兵犯闕猶有進矣故類及之以儆夫人臣有異志者

東安唐兆雄 刊

門人曾 英襄校

門人曾士琮詳校

元書卷九十七

元書卷九十八

邵陽曾廉撰

西域列傳第七十三

班固論西域主之以葱嶺葱嶺者古崑崙或遂傳會以爲天庭太帝之居多神怪焉非其實也葱嶺自足爲天下樞漢以來月氏困於匈奴遂自敦煌祁連徙焉而臣大夏又侵安息滅罽賓悉有其地漸奪天竺其後突厥破裂統葉護建庭千泉遂霸西域蓋葱嶺天下之脊水四下各注其海而兩海在脊上三大川灌之羣山周護天然四塞西戎又氣悍性懦弱則凌強則服始未嘗不爭戰敗卽屈焉耶律大石遼之皇族遼旣崩壞乃萬里整旅西臨媯水厥孚威如遂延其廟祀號爲德宗亦其效也由是言之葱嶺形勢天下莫加焉古之英雄固宜不無情於葱嶺也地險且遠中土之人

世治則略之世亂而後趨之其南面臨民者又非冠帶之倫而反襲其揉麕刻蜜之俗治之不以其道故其地戎焉竊嘗謂天下之大莫利於瀛海莫要於葱嶺此聖人所以卜天地之中也居中以制其旁鞭箠使之可也榛榛狉狉異教代興悲哉彼族豈有翕然產自空桑者乎威不單不滅豐蔀不可以驟照蓋自孝武求人爲將相及使絕國天啟戎心朔月哉明中阻千餘年元興太祖父子祖孫齒落於馬首然後白頭赤髮咸通陽谷將乃蠻有慧之執爻以驅抑物將顯必數闕而後闕也今考其師行所及南極於南海北極於北海西至於西海亦略盡矣其時車轍馬迹重淵絕巘皆立驛傳航梯往來夷如堂闕亦盛王所希有也而前史失錄遂使往蹟闕然無存余校以圖籍析以葱嶺左右自苦又歷古溫宿逾嶺而抵康里漢陳湯出師道也再北嚮欽察而旁出斡羅思阿速

孛烈兒馬札兒乃捏迷思荅里爲北道左自押兒牽踰嶺循阿母河行出忽羅珊伊思八刺約天房密昔兒以達富浪甘英出使道也爲西道又自嶺西徑古懸度抵欣都思此漢晉通天竺道也又旁出可弗又忽里模子爲南道中自哈失哈兒踰嶺經麻亦囊以達尋思干則漢所謂北道出大宛而達康居奄蔡者也然自唐以後又皆循陳湯故道西北自拔達嶺經熱海碎葉于泉怛邏斯城然後西南而渡葉河縛芻大河以通天竺元祖西伐亦由賽蘭別失蘭渡忽章河則唐人出天竺道也惟尋思干立其中居所而四應故耶律太師治焉憲宗所以建行省者也據脊以使肢體帝王之略何其遠哉故嶺以內烏孫于闐龜茲之屬漢唐以來史所已詳元初皆西遼也又已附見遼史至畏吾兒哈刺魯則皆早爲名藩不以兵革又懿戚也故宜別爲之傳獨嶺以外則三帝之神威

三王之版章哲別速不台郭寶玉諸虎臣數世之成績古多未有傳焉跡其輿輶大壯山川之會英雄之資也乃掇其可信者著於篇

可弗父亦曰可不里城名也國曰阿刺黑在漢爲蜀賓後漢并於大月氏久之復國唐時曰漕國東有國曰烏伏那亦曰烏萇天寶時封勃匄準爲襲蜀賓及烏萇國王自是蜀賓亦兼稱烏伏那或亦稱阿刺黑其東近辛頭河西欣都斯河也可弗父河東流入焉北有大雪山有水北流入阿母河南鄰忽里模子西鄰忽羅珊境有數大城曰哥疾甯曰憇顏曰玉兒谷德痕初波斯回酋滅里素丹汗世有花刺子模唐貨利習彌也都玉龍傑赤城亦曰兀籠格赤亦曰月亦心揭赤亦曰月戀格赤亦曰玉里韃漢奧韃城也旣而滅里徙都尼沙不耳復徙可弗父而以玉龍傑赤奉其母以居

滅里者亦曰唯亦曰勉力旣得可弗父於是波斯遂以其城名其汗曰可弗父素丹汗云波斯本西域大國漢安息也都番兜後遂并條支闢地至乞則里八海峽乃遷都於條支東達曷河之西曰宿利城亦曰蘇刺薩儻那城達曷河亦曰弗利刺河河經宿利城東而南入於海其後國衰大秦渡海曲而東奪其地大月氏人波斯匿遂破安息而代之乃改其國曰波斯並以爲氏事在曹魏之世國俗祠天而拜火雄富多寶貨若五色鴉鶻金剛石大眞珠之屬纍纍也復有大象馴師名馬大驢大雀諸國異焉旣而大食得條支故地則反逐波斯於是波斯東保忽羅珊尋亦失之唐高宗遣使至西域分置州縣以疾陵城爲波斯都督府然無如大食何也唐末大食又衰波斯遂復國然其西境削亦遂爲回回矣其後宋史不爲傳遼史屬國軍有波斯自是遂分散各爲素丹率以城

名達於諸國遼有忽兒珊起兒漫忽兒珊者忽羅珊也亦謂之烏
那曷遼史所云耶律大石至尋思干西域諸國舉兵十萬號忽兒
珊來拒戰大敗者也起兒漫在波斯南亦曰乞里彎別有傳元曰
伊思八刺約木刺夷你沙不兒皆波斯也中國人不能別之遂以
其稱君長曰哈里發曰素丹者以稱其國或亦以其教稱曰回回
又以西方之大名稱曰西域彼亦自莫能名各稱其城識之而遂
不復知爲波斯矣然滅里有膽氣號爲驍雄志拓其國東西馳騫
會乃蠻王子屈出律奔西遼將圖盜其國乃約可弗又助之兵而
分嶺以西與之滅里大喜已而滅里兵未至而屈出律已襲奪西
遼滅里遂怒攻尋思干拔之遂盡取嶺外地遷都尋思干焉
尋思干一日尋思虔曰耶米思曰僻迷思干曰撒麻耳干曰邪迷
思干元魏曰悉萬斤國後曰薩末鞬亦曰颯末建隋唐昭武九姓

之康國也都薩寶水上曰阿迪祿城薩寶水出東山中與阿母河
隔山西北流復醜爲數河過其城北而西經蒲華北而西南流注
於小澤澤西又阿母河也蒲華亦曰普花亦曰卜哈兒曰孛合里
曰不花刺蓋昔之布豁國昭武九姓之安亦曰捕喝者也本國於
那密水南未知何時遷於薩寶水內蓋漢時大宛北臨那密河而
康居五小王地西抱其國而南如玦故張騫使大月氏誤西行至
大宛大宛送入康居康居乃傳至大月氏也其後大月氏人盡有
五小王及大宛地枝庶分王布豁得蜀王地唐以爲安國佉沙得
蘇離王地以爲史國其地有獨莫水鐵門者也門與吐火羅爲界
屈霜你迦得附墨王地以爲何國火尋得奧鞬王地順縛芻河兩
岸爲國縛芻河者漢之媯水也吐火羅者漢大月氏也媯水謂之
烏澹河亦曰漢樓河亦曰阿母河曰暗木河與那密河皆導源葱

元書 卷九十六
嶺並西北注雷翥海海亦曰大鹽池那密河亦曰忽章河曰霍闡
河二河皆長二千餘里爲古大宛大月氏康居安息膏沃巨浸也
而薩寶水居其中長不及其半而橫絕南北九國錯焉米居大宛
康居之間其中曹得漢竊匿王地爲石國則仍屬康居而東西曹
及颯木建則皆漢大宛也唐乾元時九國猶興師助順天子嘉焉
貞元後皆沒於大食矣自是遂皆無聞獨尋思干爲西遼德宗所
駐軍德宗還都虎思幹耳朵立尋思干爲河中府統嶺外於是九
姓皆兼有之又益以吐火羅地皆爲其服役又南至忽兒珊起兒
漫疆城南及於海屹然爲西面雄鎮雷翥海之西復有大澤唐書
所謂陀拔斯單北臨小海亦謂石國西海皆尋斯干之所總攝也
小海之北有阿爾吉河入焉溯河而上得達康里幹羅思以至欽
察河之東都賴水經不里阿耳阿蘭阿思旁西南流亦入小海繞

小海而西北則通阿速踰阿母河而南東則達可弗父欣都思西
則達忽兒珊伊思入刺約你沙不見入哈塔踰忽章河而東則自
故怛邏斯城以達虎思幹耳朵夷夏之衢地也故西域重寶集焉
地復多園林有池沼之勝人藝五穀勤脩園蔬土田膏沃人物秀
好足爲都會自滅里素丹汗并之勢益張乃蠻滅東與太祖爲鄰
滅里不自少抑輒令邊吏阻關無納東客至殺數使者太祖十四
年遂親征滅里數興兵又輕遷都物力大耗重以驕虐大失民和
初得可弗父及尋斯干人皆新附不樂爲用太祖至滅里沿途城
郭厚設守禦太祖皆擊破之踰二歲太祖進退忽章河上兩破尋
斯干蒲華於是滅里知尋思干不足恃思西歸你沙不見太祖遣
哲別速不台追之急滅里恐見執遂走大漠中尋入小海死其子
札闌丁亦與太祖數戰皆敗走歸可弗父太祖遣將追之遂奔欣

都思太祖收可弗父你沙不兒玉龍傑赤遂并虜滅里母妻十八年卒收波斯境土而還事皆已具本紀踰歲郭德海征斡羅思還軍札闌丁自欣都思結吐蕃帥尼倫引兵遮德海於崢山爲德海所殺或曰太宗時始遣將斬之非其實也太祖既定西域以朮赤王欽察以花刺子模隸其封內以察合台王于闐以可弗父尋思干皆隸其封內憲宗時立阿母河行省於尋思干收其地入朝武宗復以賜甯肅王寬徹使食其賦尋仍還察合台孫篤來帖木兒文宗時朝廷撰經世大典列於西北三藩圖焉至正末地爲駙馬帖木兒所據已而元亡

你沙不兒亦曰尼沙不耳曰匿察兀兒亦曰兀里兒波斯西北地東有河西北流折東南注小海西有大湖眾流注之故土甚沃有水利湖西與八哈塔屬城乞石迷接西南行距八哈塔不千里滅

里素丹汗自玉龍傑赤徙焉覲覲哈里發之位輒興兵伐之戰數不利乃改東向爭可弗父克之尋又得尋思干旣而憚太祖兵威思仍歸你沙不兒中塗走死太祖以爲滅里故都必取之以愆後患十七年拖雷太子師至你沙不兒兵未交諭之而降後輟朝貢旭烈兀大王征之素丹海身降地隸旭烈兀大王

伊思八刺約亦曰亦思法杭古安息都會番兜城也番兜亦曰和犢聲相近有數水環其城水皆入沙不能至海地多古池臺橋梁道路修整太祖旣破滅里伊思八刺約仍爲波斯首城太祖羈縻之令馴服而已太宗元年伊思八刺約酋長遂來降編籍焉其後地隸旭烈兀大王

木刺夷亦曰木乃弓亦曰沒里奚後漢木鹿城號小安息者也於安息爲別部若附庸焉隋爲穆國唐曰末祿其地北瀕小海而南

枕檐寒山大山也魏書謂連山不知名太祖駐大雪山在其東可弗父之北數千里山皆相屬國北方騰原衍沃林茂草芳耕牧皆宜都在南山內地無水國人隔山嶺鑿井相沿數十里下通流以溉田其山城至險太祖西征滅里置母妻焉哲別攻虜之拖雷太子復大掠其國太宗元年其素丹來朝然在西域名最凶悍大食盛時以爲東道兵屯其後遂背之大白立威脅鄰國霸四十餘年好養兵不惜多金兵皆刺客滅里亦不能鉗制之雖來朝外示恭順至其國暴戾如故也憲宗聞而惡之二年遣怯的不法伐之三年旭烈兀大王出師大攻木刺夷國人墜道而置毒水中爲旭烈兀將郭侃所破戰二歲諸城皆下惟乞都卜城在檐寒山上孤城峻絕不能矢石六年大軍至城下諸道並進木刺夷大驚素丹兀魯兀乃遂降其父阿力據東城攻破之走據西城復克之遂屠其

人獲金玉寶器無算一帶有直銀千笏者旣破木刺夷國威讐殊俗矣

乞石迷亦曰怯失唐苦國也或謂在印度西北蓋傳釋氏衣鉢者其人如世繪達摩像非也國東接你沙不見北阿速南入哈塔魏書言云尼山出銀珊瑚琥珀多師子山在其境內綿亘千數百里有云尼湖有大川西流轉東南流經八哈塔西曰弗利刺河其東有阿刺丁城云尼山別阜阿刺山中城也城皆回回役屬八哈塔旭烈兀西征自木刺夷過兀里兒國遂西攻阿刺丁破其游兵三萬馮撈荅而素丹降進至乞石迷忽里素丹亦降其後地入於旭烈兀國爲屬部焉

八哈塔一曰八吉打曰巴黑塔惕亦曰報達回回大都會也回回爲教創自天房天房者唐大食也亦曰亞俱羅蓋漢之條支而并

於安息爲一國焉安息後爲波斯故唐書曰大食亦波斯地也初元魏之季波斯呼羅珊人叛據條支故地波斯及拂菻討之皆不勝遂自爲國以姓大食氏遂名其國爲大食陳時摩訶末生其國都都在山上臨海者也逮長娶養婦資其財以要國人自謂天生靈智不學而著經其教亦如佛陀不拜父母國王不信鬼神每以七日會於寺禮拜天而聚講焉饌以牛羊禁食豕名曰回回其義未之詳也然國人靡然從之唐初遂奪大食自爲大食王於是西破拂菻東破波斯爲其服役其後復侵婆羅門漸攻奪葱嶺西地而北至於康石東距突騎施地方數萬里悉爲回回矣以摩訶末言回回死後神升於天遂尊異其國曰天房焉又名其嗣王曰哈里發亦曰合里伯諸部長曰素丹而羣稱摩訶末曰別庵伯爾別庵伯爾言天使也亦曰癡顏八兒聲同也天房亦曰天方諸素丹

亦或曰遜丹曰斯丹曰斯單曰算灘曰算端曰算彈曰鎖潭曰梭里檀皆聲近也素丹之次復有阿荅畢亦君長也摩訶末死後且二百年其哈里發自天房遷都八哈塔拂菻海東地也哈里發奪而有之遂北臨乞則里八海繞以海峽而南至於密昔兒國然自是國權漸替哈里發倚宗教居人上而已未幾而素丹各貳波斯遂復故國諸國亦瓦解然元時八哈塔猶有屬城三百餘也八哈塔自東至其東北與波斯阻嶺嶺復橫其國北而西曰云尼山語具乞石迷傳其下平田沃壤有古伏盧尼國城池偉壯故蹟存焉以爲殷周時古城也其西有古西女國以爲種皆女子非也弗利刺河自乞石迷貫舊伏盧尼城西而南其東復一河注焉八哈塔有東西二城跨東河上其南則道出故宿利城云東城尤瓌麗殿宇皆沈檀烏木降真爲之太祖時命火兒赤搠兒馬罕往征未服

太宗立復命幹豁禿兒蒙格禿帥師援之八哈塔屢戰不勝遂請
納貢太宗就命搠兒馬罕爲探馬赤官留鎮其地憲宗三年復命
旭烈兀征八哈塔會其國內自相圖七年旭烈兀三道出師西北
一軍出乞石迷山中東南自羅耳旭烈兀自東進至其國合里發
欲乘舸遁去不可得遂降下其三百餘城焚其殿香聞百里得七
十二絃琵琶五尺珊瑚燈檠焉已而哈里發及其將相皆被誅死
自哈里發遷八哈塔而天房故都復有素丹領之統百八十餘城
國中有大沙積土田磽薄而三面濱海皆沃衍地產吉貝穀果多
銅鐵西有數湖泊一河貫其中南流而瀦於大泊又西有紛俱摩
地那山南趨海中隋時有獸言於山其人多以爲天神之所降也
摩訶末葬其國西回回歲常拜墓有萬里至者旭烈兀旣下八哈
塔遂至其國素丹巴爾戰敗乃降諸城皆下旭烈兀遣使獻捷於

是憲宗命旭烈王其地號波斯王焉

密昔兒漢于羅國條支屬國也後條支降於安息故亦曰安息西
界焉後漢書言自安息西行三千里至阿蠻國又西行三千六百
里至斯賓國南行渡河又西南至于羅國九百五十里自此南乘
海乃通大秦是也然漢時赴大秦有二道一出乞則里入海峽范
書言安息陸道繞海北行出海西至大秦又言有飛橋數百里者
也一出密昔兒卽自于羅泛海者也甘英出使抵條支臨大海欲
渡而還出于羅道也國自後漢末爲大秦所奪遂改屬大秦唐時
復入於回回其地有大河自南山南流北入海曲濱河土甚沃有
穀麥五果同中國惟少陰雨四時炎熇旅客皆苦之其東亦際海
國處兩海間陸地闊僅百餘里東接天房而西南則山川互萬餘
里始復臨大海說者以爲其地形如屋懸巨瓠密昔兒爲其蒂懸

於屋云其國亦曰勃薩羅國西南度大磧行二千里有國曰摩隣
其人身黑俗獷地瘴癘少米麥無草木他國人之所罕經也然唐
書言在拂菻西南非也憲宗七年郭侃帥師至密昔兒可乃素丹
懾侃兵謀乃降事在侃傳師得其珠大如棗旭烈兀使侃由此渡
海焉地遂入旭烈兀大王國

富浪亦曰拂郎在漢爲大秦唐謂之拂菻富拂菻浪郎一也初大
秦都安都城城在海曲魏書所云其海旁出猶渤海也漢時爲西
域極大國列城數百周迴數萬里西北皆際大海東南繞海曲多
島嶼有峽通乞則里八海乞則里八海綴大秦旁如荷囊然惟東
北通奄蔡康居焉元嘉中其王安敦嘗使人自日南徼外入貢事
具後漢書漢末大秦已越海曲立驢分爲其屬國又東南取安息
于羅國其在乞則里八海中復有屬國曰澤散三面臨海境愈廣

矣唐書言拂菻東與苫及波斯接然是時國已分爲二都西都仍
安都東都在海峽北典略言驢分西之大秦渡海飛橋長二百四
十里卽渡此海峽也驢分卽伏盧尼也未幾驢分入於大食拂菻
東復以海曲爲界國亦漸分割乃捏迷思馬札兒孛烈兒之屬皆
其舊土割如瓜矣西都尤早入異族然宋史猶言西北皆東至海
東南至勉力沙蓋舉其舊疆言之亦久不名拂菻元時其地二三
千里而未有有名通中國元人本其故號曰富浪云地產五金紋
石多蒲萄亦無甚珍寶其吞刀吐火之術後亦漸衰焉憲宗八年
旭烈兀旣破密昔兒乃使郭侃渡海往說其素丹兀都諭以禍福
兀都遂來降其後至正時復獻異馬高八尺三寸脩如之而加半
焉頸昂如鳳帝御慈仁殿臨觀稱歎敕翰林學士夔夔選工爲之
圖直學士揭傒斯爲贊其圉人碧眼胡言七渡重洋始通中國焉

石羅子一曰設刺子東爲乞里彎東南爲忽里模子南瀕海並漢
烏弋山離也烏弋山離在剌賓南復西直安息之南而西抵條支
故漢書言玉門陽關至烏弋山離南道極矣轉北而東得安息也
唐時波斯西南皆際海則其國早并於波斯矣然石羅子在伊思
八刺約之西南正所謂轉北而東也其南臨忽里模子海峽太祖
時皆讐服焉尋復不貢憲宗八年郭侃自富浪還師臨西南海征
未服者其素丹換四千阿荅畢拒戰侃一鼓破之乃降地屬旭烈
兀大王

乞里彎亦曰設里汪遼爲起兒漫西遼德宗稱皇帝處也德宗尋
東還留部人鎮之故又曰黑契丹國焉國北卽忽兒珊也有城曰
拔里寺出師子其髮尾如纓拂傷人吼則聲從腹出馬聞之怖溺
血郭侃下兀林乞里彎素丹忽都馬丁知不敵又聞旭烈兀大賢
乃降地入於旭烈兀大王

忽里模子亦曰忽魯木石曰忽魯謨斯亦曰阿魯曰兀林唐狼揭
羅也初烏弋山離西境入於波斯東境猶自爲國久之亦漸沒焉
波斯衰乃復自立元時曰兀林所屬百二十城東接俱藍北接阿
刺黑地多沙磧岡阜重複有水入於大海及辛頭河然無巨流物
產甚薄亦出師子多羚羊其屬城有賓鐵臨海峽太祖命朵魯伯
征其地遂降尋復不貢憲宗八年郭侃自石羅子伐賓鐵賓鐵人
大敗素丹牙牙降侃卽卷旆疾驅向兀林阿必丁素丹因陳兵四
萬以禦之侃大破其眾阿必丁遂降地屬旭烈兀大王自後皆名
忽里模子峽亦曰忽魯模斯峽以本烏弋國忽里忽魯烏弋阿魯
兀林其聲同也旣而朝使航海至者率由賓鐵登陸嗣王阿不哈
築城其上遂號其城曰阿不哈大王城

欣都思一日身毒一日遜都思漢天竺國也北與扮卜土蕃接東有大河西有辛頭河兩河夾其國而南河各訖於海而地復伸出如人舌巨海環焉中有恆河合於東河地東西五千餘里南北七千餘里唐書言天竺有五都茶鏘和羅城五天竺之會也產金剛黃玉青精明珠香木珍藥雕鏤玉器薄如蟬翼他國弗能及復有師子馴象大鳥多吉貝俗龔雕題額多刺紋以爲觀美男常裸程女則否初欣都思人亦尙拜火自佛興而浮屠道盛說者以爲賢懿挺生地多靈蹟亦無甚殊異也宋時頗爲滅里所侵伐太祖十八年旣平滅里遂渡辛頭河征欣都思十九年至其東部見角端耶律楚材勸太祖班師於是乃還語在楚材傳太宗元年欣都思王遂朝於京師憲宗二年復合禿兒法撒邱征欣都思或曰欣都思後爲旭烈兀大王所征服遂爲旭烈兀屬城史文殘缺莫能詳

也

怯失迷兒亦曰迦葉彌兒唐曰箇失密亦曰迦溼彌邏北欣都思也雪山環抱其境如玦辛頭河土蕃出也河繞雪山北而達西欣都思焉太宗時有浮屠斡脫赤及其弟那摩歸朝旣而斡脫赤領怯失迷兒萬戶請往諭其國主爲所殺事在鐵哥傳於是憲宗大怒乃命塔塔兒帶撒里士魯花征怯失迷兒獲其國主誅焉

占八亦曰蘸八亦曰乾伯唐占卑國也唐會要言大中六年占卑佛邪葛等來朝兼獻象唐書無占八傳而有瞻博云北距競伽河多野象羣行顯慶中來貢事有同異要是一國也或言宋史三佛齊國王號詹卑以其君之名稱其城後凡大酋所居號詹卑卽占八也非也占卑國之名起於唐在三佛齊名國之前矣宋史言注輦國遣三文離本國七十七晝夜至鄒勿丹山娑里西蘭山至占

賓國卽唐占卑元占八也舟過西蘭山乃至則在僧迦刺東言濱
 兢伽河則在東欣都思也兢伽河者恆河也大德四年同弔吉而
 瓜哇暹國二十二人來朝賜衣遣之至大三年占八國王遣其弟
 札刺奴等來貢白面象伽藍木桑加失里奏請人使海外諸國武
 宗遣察罕亦不刺金楊忽荅兒阿里使占八焉

馬八兒亦曰馬法兒南欣都思之地也而西南皆際海世祖平宋
 峻都等遣使奉璽書十通招諭諸蕃占城馬八兒俱奉表稱藩或
 曰馬八兒俱藍爲天房海西之國非也至元十八年正月楊庭璧
 同哈撒兒海牙使俱藍至僧伽那舟人以阻風乏糧勸往馬八兒
 國假陸道以達俱藍馬八兒國益近僧迦那矣四月至其國其宰
 相馬因的不里阿皆託言道不可通然翌辰至館屏人而告以情
 言算彈兄弟五人皆聚於加一議欲與俱藍交兵及聞天使來稱

貧陋此實妄也回回寶貨商賈盡來此間台有降心若能下馬八
 兒我招諸國可悉降也及俱藍入貢二十年遂遣僧撮及班入朝
 二十三年進銅盾及氈甲鞍轡又同蘇木都刺等入貢世祖亦數
 遣使至其國訪求方技並取其國佛鉢舍利馬八兒隨遣使進奇
 獸一似驪而巨毛黑白閒錯名阿塔必云其後元貞二年遣使賜
 其王塔喜二珠虎符延祐元年馬八兒王昔刺丁遣其臣愛魯思
 丁貢方物

俱藍亦曰咀喃其國西濱海唐信度國地宋注輦國也南與馬八
 兒接西與忽里模子接舊史言其國至阿不合大王城順風十五
 日又言俱藍爲馬八兒後障陸地可通故西欣都思也宋史言東
 距海西至天竺東西互誤也世祖平宋馬八兒稱藩俱藍未至泉
 州行省議遣十五人往諭之世祖曰此非峻都所可專也十六年

乃遣廣東招討司達魯花赤楊庭璧招俱藍十七年至其國國王必納的令其弟肯那卻不刺木省書回回字降表附庭璧以進言來歲遣使入貢帝復授哈撒兒海牙俱藍宣慰使偕庭璧以往明年以阻風哈撒兒海牙還又明年庭璧再舉至俱藍國王及其相馬合麻等迎拜璽書即遣其臣祝阿里沙茫里八的入貢二十四年復遣使不六溫乃來朝二十八年復遣馬丁刺罕丁進方物其歲以鐵里使俱藍其後貢獻不絕事散見本紀

扮卜亦曰班布亦曰八魯布唐泥婆羅也在東欣都思北土蕃西南有大河流入恒河至元九年嘗遣使諭之至治元年英宗使咒師朵兒只往扮卜取佛經焉

僧迦刺亦曰僧迦那晉時師子國也義熙中嘗通中國焉地在南欣都思之南而東大海中釋法顯言其國任洲上東西五十由延南北三十由延左右小洲乃有百數相去或十里二十里或二百里統屬大洲欣都思言亦曰僧伽羅國其地常暑豐米穀有山曰稜伽亦曰西蘭宋史見焉其山有巨人迹以爲盤古足迹或曰佛迹未之詳也或又以爲狼牙脩國則非也狼牙脩在馬蘭丹之西中土往赤土者望見狼牙脩之山乃南至赤土則其國在不憐八之東北明非此山也山產紅青黃鴉鶻昔剌羅窟沒藍諸寶石嘗以大雨流山下土人就而拾之蚌珠尤富亦多名藥至元十八年世祖遣札木合持十萬金命阿不哈大王市藥師子國蓋以古名名今地也二十一年復遣參知政事亦黑迷失使僧迦刺國觀佛鉢舍利焉

欽察亦曰欽又漢奄蔡也其後兼有粟弋故元魏以粟持爲古之奄察粟持故粟弋也都不租河濱河出太和嶺中西北入於海國

以太和嶺爲東界西與孛烈兒南與康里斡羅思接北臨海國人
名曰寬田吉斯海云地方數千里廣莫荒塞不生五穀多業漁南
仰粟於康里俗勇猛人青目赤髮自此而西北至故嚴國夏夜極
短日暫沒卽出矣初其先汗曰曲年者本武平北哲林川按答罕
部族後徙居西北玉里伯里山因所居伯勿吾山爲氏或亦作白
野焉曲年生陵末納陵末納生亦納思世襲汗位茂里乞遺族霍
都亡奔欽察亦納思納之太祖使責之曰汝奚匿吾負箭之麋當
亟還不然禍及汝矣亦納思曰逃鷗之雀叢薄猶能生之謂吾顧
不如草木乎於是太祖怒趣速不台進兵是時亦納思已老國中
大亂其子忽魯速蠻孫班都察以其族降班都察子曰土土哈土
土哈子曰牀兀兒俱仕於朝積功爲大將自有傳欽察旣降速不
台還國人共立玉里吉汗十七年太祖遣哲別伐之以朮赤統

其軍十九年速不台復引兵繞寬田吉思海出太和嶺至不租河
虜玉里吉哲別亦自康里北逼欽察遂收其境太祖遂留朮赤王
之太宗時朮赤已薨國人謀復叛乃立八赤蠻爲汗以抗朝命八
赤蠻有膽勇拔都嗣欽察王則請復以速不台將兵討之於是八
赤蠻懼逃於海速不台虜其妻子是時蒙哥大王方同拔都西征
遂渡海俘八赤蠻以歸欽察平

斡羅思一曰兀魯思亦漢奄蔡也奄蔡亦曰闕蘇後漢改曰阿蘭
聊元魏曰粟持國亦曰溫那沙闕蘇阿蘭聊溫那沙斡羅思其音
一也蓋唐後國分爲二欽察襲奄蔡名斡羅思襲其改名斡羅思
復取康居西地國益廣焉元時北鄰欽察南鄰阿速東與康里西
與孛烈兒接都禿里斯哥城其酋稱曰密赤思臘地方數千里分
數十部部各有長而禿里斯哥爲大酋阿里吉河自其國之北而

東過康里南入小海焉產皮革麻穀工冶鐵木多椽榆松太祖十八年哲別擊斡羅思於鐵兒山獲其密赤思臘其歲速不台復自欽察南渡阿里吉河擊大小密赤思臘降之是時太祖以朮赤爲欽察王兼王斡羅思斡羅思未卽服太宗十三年欽察王拔都來討圍禿里斯哥不能下速不台至軍遂虜其密赤思臘也烈班復攻禿里斯哥三日克之斡羅思遂盡臣服拔都輸貢賦憲宗三年朝廷使括斡羅思戶口七年復以乞解爲斡羅思達魯花赤監治之焉

康里一曰康鄰漢康居也本游牧行國冬夏異居冬治到卑闐城有都賴水水在康里東南夏所居在康里西漢時奄蔡粟弋嚴國皆爲其屬而南服大宛西域大國也元魏曰者舌國其後昭武九姓亦有康得其南地國勢分矣元時都阿里吉河上曰撒耳柯思

東鄰哈刺魯西與斡羅思北與欽察南與尋思干接地方數千里產材木銅鐵宜稼太祖使哲別伐欽察遂擊康里至孛子八里康里汗霍脫思拒戰大敗虜之遂取其國太祖以欽察王朮赤兼王其地因都焉

阿速唐突厥可薩部也漢爲安息國地都阿速海上海曰乞則里入海北接斡羅思南接波斯西接孛烈兒東接康里地方數千里二大川自斡羅思南流貫其國中海水縈紆土宜耕牧兼魚鹽之利太祖時哲別討斡羅思道阿速攻之其國王杭忽思戰敗乃降於是朮赤兼王其地撒吉刺在其東南亦屬焉

馬札兒亦曰馬茶漢大秦地也都禿納河上河東流經富浪入乞則里入海通舟楫瀚甯河在其東入禿納河東有哈晒里山高入雲霄亦曰雪嶺其東北與孛烈兒接西南與乃捏迷思接俗勤農

元書 卷九十一
三
牧豕產銅太宗時馬札兒酋怯憐號能戰拔都既討平斡羅思遂擊馬札兒五道並進至禿納河拔其城而還事具速不台傳
孛烈兒漢大秦地也北臨孛烈海南與馬札兒西與乃捏迷思東與欽察斡羅思接地方千里蕩平如砥林芳草茂宜九穀五果產材木石炭蜂蜜太宗時兀良哈台從拔都平之後屬月即別王國乃捏迷思亦大秦地也禿納河貫其中流入馬札兒國西北各際海東與孛烈兒馬札兒接南與富浪接地方數千里產五金寶石赭石磁石陽起石玻璃汞礬硃沙多布褐定宗時拔都將兀良哈台平之其北有苔里漢大秦海濱荒地也斗入海中海環其西北東三面惟南與乃捏迷思通其東北踰海故嚴國也地宜五穀蕃牛馬哲別之西伐也遣其將郭德海踰雪嶺略地萬里平其國而還

論曰儒者多以勤遠略爲佳兵然有元之興也以武兵息而國亦衰矣斡難窮荒遂能奮厥戈鉞臣服數萬里豈謂非聖人之威哉遼闊邇天以其親子弟泄之亦雄於愛矣卒雖盱草昧雷雨曠焉猶未及革之上六禮仍其俗與宜未聞不脩教而從政也虞仲斷髮文身方箕子之俎豆明而近息吳越終然秀良豈非天乎信天之心拱手俟之可也

元書

卷九十八

元書卷九十八

遺

李秉乾 刊

衡陽劉蒸川 刊

門人曾傳一襄校

門人曾士琮詳校

48-11463

